


# NKAMBWÀ ABRAHAM

 Mukàndà wà Genèsè cyàkàbìdì, nshapità wa 22, kubangila ku mvensà wa 15, ne tudi tutèkemena mpindyewu ànu bwà kwakulakù katanci kakesè cyanààna bwà kubanga kusambidila babèèdì Genèsè 22, kubangila ku mvensà wa 15.

*Ne mwanjèlo wa MUKALENGE wàkabiikidila Abraham mu dyulu bwà musangu mwibidì,*

*Ne wàkamba ne: Ngädicipidi ku mèmè mwinè, mùdì MUKALENGE wàmba, bwalu wèwè wenji cintu eci, ne kuyi mumbèngèle mwanèèbè wa balùme, mwanèèbè wa balùme umwèpelè,*

*Bwà ne mu kubènesha mèmè nènkubènèshè, ne mu kuvudija nèmuvudijè dimiinu dyèbe bu mìtootò yà mu dyulu, ne bu nsenga yidì ku mwelelu wà mbù; ne dimiinu dyèbè nedikookeshè biibi byà mwena lukunà wadi;*

*Ne mu dimiinu dyèbè wèwè nemùbeneshiibwè matungà ònsò a pa buloba; bwalu wèwè watùmikidi diyi dyànyì.*

<sup>2</sup> Mulayi kaayipu's wè, bwà ditùmikila! Ditùmikila ki ditù Nzambi muswè. Bàakamba musangu kampànda ne: "Ditùmikila ndimpè kutàmba mulàmbù." Kutùmikila Mukalenge nkutàmbe mulàmbù kanà wònsò wùdì mufwànyine kufila.

<sup>3</sup> Tudi bakùngàmàngàne mpindyewu ne cyena-bwalu cinène, dilòòlò edi ne: *Nkambwà Abraham*, uvwabò bàbiikila ne "taatù wa Diitabuujà" awu, bwalu Nzambi wàkamupèesha mulayi wà kupyàna buloba, ne Dimiinu dyèndè. Ne ku Abraham nkutùdì twètù, biikàle bafwè mu Kilstò, bavwijijbwe Dimiinu dyà Abraham ne biikàle bapyànyì pàmwè Nendè bilondèshile mulayi.

<sup>4</sup> Mpindyewu, Abraham ùvwa ànu muntu wetù wa pàtupù ewu, kàyi cintu kampànda cyà pabwàci to. Nzambi kàakamubiikilakù to, bwà byònsò bitùdiku buumvwè, ànu pàkaavwàye ne bidimu makùmi mwandamutekètè ne bitaanu. Mukajèndè, uvwa mwanààbò wa bakàjì mukwàtatwèndè, mwikàle ne bidimu makùmi àsambòmbò ne bitaanu mwinè musangu awu, pàmwàpa bàkaavwa basòmbe pàmwè kacya ànu pàcivwàbo bânà batekète menemene. Ne yèyè ùvwa nkumba, kàyi ne bânà to. Nzambi wàkalòmba ditàpuluka mu kaabujimà, bwà kutàpulukayè ne bakwàbò bàà pa buloba, ne bàà kwàbò bònsò, ne bàà mu cifuku cyèndè bònsò. Ki cintu cyà pabwàci cyà kwenzayè cívwa ncyòci aci.

<sup>5</sup> Nènku pàdì Nzambi muswè bwà wèwè kwenza cintu cyà pabwàci, Yèyè ùdì ulòmba ditàpuluka mu kaabujimà ne mpatà

kanà yònsò. Bikèngela ùfikè ku ditùmikila mu kaabujimà, bwà kutùmikila cidiYe wamba. Nzambi ngudi ucilòmba. Kwèna mwà kucyènzà mùshindù mukwàbò to. Nènku, mpindyewu, Yèyè ùtu misangu yònsò ànu ùfila cileejilu, ne ciinè aci ki civwà cileejilu Cyèndè, cyà ditàpuluka mu kaabujimà ne fàmiyè wèndè mujimà, bàà mu cifuku cyèndè bònsò, ne bakwàbò, bwà kwenda lwendu lutàpùlùke bwà Nzambi.

<sup>6</sup> Bidimu kupitàbì, cintu nànsha cìmwè kaciyi cyenzèke to, kàdi Abraham ùvwa ànu kacya wàkwàta. Kààkateketakù mu mabòko to. “Yèyè kààkatènkakanakù ku milayi yà Nzambi ku bupidyà to, kàdi ùvwa ne dikàndà, ùfila butùmbi kùdi Nzambi.”

<sup>7</sup> Ku cidimu ne ku cidimu, pavwàbi byènda biya, kakùyì mpatà to badyudi bààbùngì bàvwa bàlwa kùdiye bàmba ne: “Abraham, taatù wa bisàmbà, ukàadi ne bânà bùngì kaayi mpindyewu?” Aci kacyakamutènkakajakù to. Kàyi ne mwànà, ne Sarah ùkaavwa mumanè kupità cikondo cyà mwoyi, cyà kulela kwà bânà, mu bushùwà bwà bwalu, mupite ne kule ne dibènga kuya ku mashi, kàdi nànsha nànkù Abraham ùvwa mwitàbùùje Nzambi ànu bu ne kakùvwa bwalu. Wàkadilongolola bwà mwànà awu, bwalu ùvwa mumanyè ne ùvwa mutwìshùbwe ànu menemene ne Nzambi kàvwa mwà kufila mulayi wùvwaYe kàyi mukùmbàne kutwà nyama ku mikòlò to.

<sup>8</sup> Bìvwa bikèngela bwà Dimiinu dyèndè kweladi meeji àmwèàmwè awu. Nànsha mùvwàwu wùmwèka bu kawùyì mulèlèlè, wùmwèka bu kawùyì wùpetangana ne meeji a mubidi, kàdi Nzambi kèna mwà kufila mulayi wùdiYe kàyi mukùmbàne bwà kutàngila bwalu bwàwù to. Twètù tudi twitabuuja cintu cìmwècìmwè aci leelù ewu. Dimiinu dyònsò dilelèlè dyà Abraham didi diitabuuja cintu cìmwècìmwè aci. Maalu àdi ènzekà nànsha miikàle bìshi, dimanya ditùdi twètù bungwije nànsha diikàle bùngì munyi, bintu bìdi byenzèke nànsha biikàle bùngì munyi, nànsha kabiyi bikùmbanangana ne meeji a mubidi, nànsha ciikàle cikùtākàne bìshi, èyowà's, ne meeji a mubidi, kaciyèna ne cìdici cìshintulula to nànsha kakesè. Piikalabi ne Nzambi Yèyè mmwambè nànkù, ki cyòci. Ne Dimiinu dyà Abraham ndijaamijila pa EMU MMÜDÌ MUKALENGE WAMBÀ. Aci ncikòse bwalu.

<sup>9</sup> Tudi tusangana ne, ne bidimu makùmi àbìdi ne bitaanu bimanè kupità, bânà kabàyikù to. Kàdi Nzambi ùvwa ànu ne lulamatu bwà kushàala kacya ànu wàkwàta ku mulayi Wèndè kùdi Abraham, bwalu Abraham ùvwa mwitàbùùje Nzambi. Mwànà mukesè wa balùme awu kulwayè mu cyalu, Izàkà mwànà awu.

<sup>10</sup> Nènku paanyimà pàà Izàkà mwànà awu mumanè kulwa mu cyalu, dībà adi tudi tusangana ne Nzambi wàkamwela ku diteeta misangu yìbìdi. KwambaYè ne: “Mwànà ewu...” Paanyimà pàà yèyè mumanè kwikala ne bidimu bitwè ku lukàmà ne

dikùmi ne bitaanu, anyi ne makùmi àbìdì, bìvwà naabi Abraham. KwambaYè ne: “Ndi muswè wàngatè mwanèèbè umwèpelè wa balùme ewu, ùbandè nendè ku mukunà kùNgààkuleejà aku, ne kwòkò aku ùmulàmbùlè, pa mukunà ewu, bu mulàmbù.” Mu ngaakwilù mukwàbò, kunyangakaja cileejì cyònsò civwàye naaci cyà ne mulayì wùvwa mufwànyine kukumbana aci’s. Mbwena kwamba ne kuumusha bintu byònsò byà mubidi.

<sup>11</sup> Ki Abraham kwambayè ne: “Ndi mumupetè bu udi mufùmìne ku bafwè. Ne ndi mutwìshìibwe ànu menemene ne Yèyè ùdi ne bukolè bwà kumubiisha ku bafwè.”

<sup>12</sup> Ki cisàmbà mpindyewu cidì Dimiinu dyà Abraham ncyôci aci, bwalu Yèyè mmutùbìishe ku bafwè. Twètù tuvwa bafwè mu mpèkaatù ne matomboka. Ne Yèyè Úvwa ne bukolè bwà kushintulula ngeelèlù wa meeji àànyì, kushintulula meeji àànyì awu, kushintulula ngiikàdìlù wanyì, kunshintulula mu byònsò awu, Ùdi mwà kwenza mudìbì bìMusànkisha. Cyònsò cidìYe wàmba aci, mèmè ndi ngiitabuujà ne m’Bulelèlè, ne Dimiinu dyònsò dyà Abraham didi diitabuujà cintu cimwècimwè aci.

<sup>13</sup> Abraham, kàyì ùshikukila Nzambì to, wàkangata mwànà mukesè wa balùme awu. Ne mu dindà amu, kwambilayè basadidi ne: “Indìlaayi apa ne tumpundu etu. Nènku mwanàànyì wa balùme ne mèmè netùye kuntu kwàka bwà kakuukwila, ne yèyè ne mèmè netwàlukilè.” Kaa, neikalè mwà kucyènza bishi’s? Pèndè wènda ùbandà ku lusongo lwà mukunà, bwà kashebeya mwoyi wà mwanèndè sungasunga, kàdi wàmba ne: “Mwànà awu, mwànà wa citende awu ne mèmè nèt看lukilè.” Úvwa mumanyè ne cintu kampàndà civwa ne cyà kwenzeka. Kàdi kàvwa mumanyè ànu menemene mùshindù wùvwa Nzambì mwà kucyènza to; abu kí mbwalu bwèndè yèyè to. Yèyè mmumanyè ne Nzambì ngudi mucilayè.

<sup>14</sup> Ki cyònsò citùdì tutàbaleela bwà kumanya, Nzambì ngudi mucilayè! Necìikalè munyi? Ncyèna mumanyè to. Kàdi Nzambì ngudi mwambè nànkù! Yèyè neatumè Yesù Kilistò, bwà musungu mwibidì, Yèyè nealwe mu mmwènekelu wa mubidi. Neànanè Bèndè Sungasunga. Nekwìkalè bidimu cinunu, bukòokeshi bwà bidimu cinunu pa buloba ebu, pàmwè Nendè, pàmwè ne bapikula. Ki cyàkalayàYe ncyôci aci, nènku twètù tudi bindile bwà dìbà adi kuseemenadi.

<sup>15</sup> Yèyè wàkalaya bwà kwondopa babèèdì, bwà kubiisha bafwè, bwà kwipata baadémons. Yèyè ngwàkalaya bwà kucyènza. Yèyè udi umwèumwè awu makèèlèlè, leelù too ne kashidi. Mmunyi? Ncyèna mumanyè to. Yèyè ngwàkalaya bwà kucyènza! Twètù tudi tuciitabuujà; aci ncikòse bwalu. Pàdì muntu wìtabuujà Nzambì, ùdi wìtabuujà byònsò bìdìYe wàmba.

<sup>16</sup> Nènku mùshindù awu ngùvwa Abraham mwitàbùùje Nzambì. Mpindyewu yèyè kulòmbiibwayè bwà kunyangakaja cileejì cyònsò cyà ne mulayì Wèndè awu bwalu bwàwù bùvwa

mwà kutàngidiibwa, kàdi yéyè ùvwa mutwishìibwe ne Nzambi ùvwa mwà kucyènza.

<sup>17</sup> Mpindyewu, Yéyè kààkafila ànu mulayi munène ewu cyanààna to, Wàkawùfila kàbìdi kùdi Dimiinu dyèndè. Nènku bwalu Abraham ùvwa ne lulamatu, ne wàkashààla mulamè Dìyi dyà—dyà Nzambi òvwa Nzambi mumulayè, ne mumanyè ne Nzambi ùvwa mwà kubiisha mwànà ewu ku lufù. Nènku yéyè kààkalaminyina mwanèndè mulela awu to; kàdi (Nzambi) cìvwa ncifwànyikijilu cyà Nzambi mwikàle ùfla Mwan'Èndè, mu bushùwà bwà bwalu; pàvwaye mwambùle nkùnyi ayi pà mukùnà apu, ne bikwàbò; mùvwa Kilistò mwambùle cishipeelu Cyèndè Sungunga cyà Mulàmbù, mutàngile pa kakùnà, pààkapoopediibwàYe pa nkùrusè apu.

<sup>18</sup> Tudi tujungulula ne mu cyòci eci, mu kwenza kwà cyòci eci, byàkasànkisha Nzambi bikolè be bwà kumòna ne Abraham ùvwa muMunangè kumutù kwà byònsò pa buloba, nànsha mene mwanèndè umwèpelè wa balùme awu. Ùvwa muMunangè kumutu kwà cìvwa muntu kanà yònsò mufwànyine kwamba, muntu kanà yònsò ewu mufwànyine kwenza, ùvwa ànu munangè Nzambi bikolè bwà kwitabuuja Dìyi Dyèndè.

<sup>19</sup> Dimiinu dyà Abraham dyònsò's didi diitabuuja Nzambi mùshindù awu. Bàdi biitabuuja Nzambi. Ne tudi bamanyè ne byàkasànkisha Nzambi bikolè be mu mùshindù wà ne ki cyàkambàYe eci ne: “Dimiinu Dyèbè nedikookeshè biibi byà mwena lukunà wadi. Dimiinu Dyèbè nedikookeshè biibi byà mwena lukunà wadi.” Vùlukàayi ne, aci ng'EMU MMÙDÌ MUKALENGE WÀMBA. Dimiinu dyà Abraham didi diitabuuja nànkù. Pawikalà Dimiinu dilelèlè dyà Abraham, diitabuuja òvwa naadi Abraham mu Nzambi adi, didi munda mwèbè wèwè. Ne udi witabuuja ne cidi Nzambi mwambè, Nzambi ùdi ùshààla mukwàte ku mulayi Wèndè.

<sup>20</sup> Ne Yéyè ngudi mucyàmbè, mpindyewu vùlukàayi ne, Yéyè wàkafila mulayi ewu kùdi Abraham paanyimà pàà Yéyè mumanè kumwela ku diteeta. Dimiinu dyà Abraham didi ne cyà kwanji kuteeciibwa dyàmbedi, bwà kumòna nì mbiitábùùje cyà bushùwà Dìyi. Vùlukàayi ne, mùshindù wùmwèpelè wùvwayekù mwà kushààla mulamè mulayi wà Nzambi, mbwalu wàkiitabuuja mulayi wà Nzambi, ne wàkeediibwa ku diteeta dyà ne ùvwa muCìtábùùje anyi to.

<sup>21</sup> Twètù tudi tupìcishiibwa ku dyòdi diteeta adi. Dimiinu dyà Abraham, leelù ewu, didi dipìcishiibwa ku dyòdi diteeta adi. Netwàngatè Dìyi dyà Nzambi, anyi tudi twangata cidi muntu mwambè pa Dyòdi? Netwàngatè cidi bulongolodi kampànda bukwàtàkàje bu twitabàayi, ne twitaba ciinè aci, anyi tudi twangata cidi Nzambi mwambè? Pìikalàbi ne Dìyi dyà Nzambi ndilelèlèlè, tudi twitabuuja Dìyi dyà Nzambi, nànsha cidi nì ncinyi cikwàbò ciikàle. Tudi tulekela dìyi dyà muntu yònsò ewu diikàle

mashimi, kàdi dyà Nzambì diikalè Bulelèlà. Dimiinu dilelèlà dyà Abraham! Kàdi kumpàlà kwà wèwè kulwa Dimiinu dilelèlà adi, bikèngela ùpicilè ku diteeta adi, mwàkenzà Abraham amu, yèyè mwinè. Yèyè kàakalaya ànu Abraham to, kàdi Dimiinu dyèndè divwa mwà kukòokeshà biibi byà beena lukunà. Kaa, ekèlekèle!

<sup>22</sup> Anji elàayibi ànu meeji, nkambwà awu ùvwa mutwìshiiibwe ànu menemene mwòmò amu, mu diteeta dyèndè dyà mulayi wà Nzambì adi amu ne, ncyà bushùwà. Nànsha maalu àvwà ènzekà miikàle bishi, yèyè ùvwa ànu mwitàbùùje ne Dìyi divwa dilelèlà. Abraham, nkambwà munène awu, kàakateketakù mu diitabuuja to, pàakapicishiiibwàye mu cikondo cyà diteeta aci. Ùvwa mwitàbùùje ne Nzambì ùvwa ne bukole bwà kumubiisha ku bafwè. Ùvwa mucitàbùùje, bwalu Nzambì nguvwa mwenzè mulayi. Nènku pàakenzà Nzambì mulayi ne yèyè neikalè “taatù wa matungà,” yèyè wàkiitabuuja ne bivwa nànkù. Yèyè kàvwa mumanyè ne nebiikalè bishi to. Pàakalwà mwànà awu, paanyimà pàà yèyè mumanè kweyemena, bidimu makùmi àbìdì ne bitaanu, pashiiishe kulòmbiibwa bwà kubùtulayè mwànà awu, yèyè uvwa ànu mumanyè ne mulayi wà Nzambì wùvwa mulelèlà, ne kufilayè mwanèndè wa balùme awu.

<sup>23</sup> Dimiinu Dyèndè, cintu cimwècimwè aci! Mulayi wà Nzambì nciitampi, kùdi aba bàdi Dimiinu dyà Abraham abu. Mulayi nciitampi, bujaadiki butwà cyàlà. Nènku patùdi twitabuuja Dìyi dilaya dyònsò, dìbà adi tudi tupèeshiiibwa citampi, bwà kushindika mulayi. Nwamònu’s, twètù—twètù, biikàle Dimiinu dyà Abraham, tudi tupicila mu diteeta bwà kumòna ne netwìtabuuje Bible, anyi to. Bible n’Dìyi dyà Nzambì, bwalu Ùdi Nzambì. Ne pashiiishe paanyimà pàà wèwè mumanè kupicila mu diteeta, bwà kwitabuuja.

<sup>24</sup> Pàdi bàmwè bàmba ne: “Matùkù a bishimà àkaadi mapite,” wèwè mwitàbùùje aci, aci cidi cibèngangana ne Dìyi.

<sup>25</sup> Wèwè wamba ne: “Kwèna upeta Nyumà Mwimpè to, leelù ewu. Cintu bu nànkù kacitukù to. Ànu bàpostòlò dikùmi ne bàbìdì mbàakaMupeta.”

<sup>26</sup> Dìyi ndidi dyambè, Peetèlò ùCiyiisha mu Ditùkù dyà Mpenta, kwambayè ne: “Nyingàlàlaayi, yònsò wa kunùdi, nùbatiijiiibwè mu Dinà dyà Yesù Kilstò bwà dilekelediibwa dyà mpèkaatù, nènku nenùpetè kupà kwà Nyumà Mwimpè. Bwalu mulayi wùdi kunùdi, ne kùdi bânà bèènù balela, ne kùdi aba bàdi kule menemene, mu bungi bwònsò bwàbiikilàbo kùdi Mukalenge Nzambì wetù abu.”

<sup>27</sup> Ki cyòci aci menemene cidiCi cyùmvwija. Cidi, mpindyewu wèwè mudilongòlòle bwà kwangata diteeta, dyà diteeta dyà ngwengwengwe dyà Nzambì, ne kulonda kabèji kàà bwanga aku, ndi nkwambila’s, neùjandulè ne Nzambì ùtu ùshààla mukwàte ku Dìyi Dyèndè, bu wèwè mwà kuCìitabuuja. Ncyà bushùwà. Kàdi bikèngela ùpicilè ku aci, bwalu aci ki citampi; pawikalà

mwà kuCyàkidila, díbà adi neùpetè mulayi awu. Bwalu, ki kabèjì kàà bwanga kàà Nzambi, mùshindù wùvwàbi bikèngela bwà twètù kucyènza, ne mùshindù awu ki wùdìbi bikèngela bwà twètù kuCilonda, ànu cyàkambàYe aci. Mpindyewu kí ng'ànu kùdi bàmwè to, kàdi “ewu yònsò,” ewu yònsò udi witabuuja, ewu yònsò udi unyingalala, ewu yònsò udi witabuuja. Nkùdi nkòngò yònsò, kùdi bisàmbà byònsò, ewu yònsò udi muswè kuCìitabuuja awu. Ne diitabuuja mu Díyì dyà Nzambi dìdi dìkufikisha ku mulayi ewu. Díbà adi, ne ànu díbà adi, ki paùdi mwà kupeta bukolè bwà kwikala ne citampì cyà mulayi.

<sup>28</sup> Ne mulayi wutùdi tupeta, citampì aci, ndibàtiiza dyà Nyumà Mwímpè. Ncyà bushùwà. Bwalu aci n'Nzambi mu mmwènekelu wa Nyumà, wèwè mwikàle ne Díyì Dyèndè munda mwèbè, díbà adi Yèyè ùdi ùbwela. Wèwè mupetè Díyì munda mwèbè, Nyumà Mwímpè ki cintu cìmwèpelè cìdi mwà kuDìvwija ne mwoyi, ne díbà adi udi ne mulayi wà kukòòkeshà ciibi cyà mwena lukunà yònsò udi uteeta bwà kukubùndula. Ncyà bushùwà. Nzambi ngudi mucilayè, ne ki mùdìbi nàнку.

<sup>29</sup> Mpindyewu, vùlukà ne, udi mwà kucyènza ànu díbà adi, ne ànu díbà adi, paanyimà pàà mumanè kwediibwa ku diteeta dyà Díyì.

<sup>30</sup> Abraham wakeediibwa ku diteeta dyà Díyì. “Newitabuuje, Abraham, ne neùpetè mwànà awu anyi?”

“Èyowà.”

<sup>31</sup> Mwànà awu kulwayè. “Mpindyewu mubùtùlaaku. Ucìdi ànu mucitàbùùje anyi, Abraham?”

<sup>32</sup> “Ndi ncìitabuuja, nànsha nàнку, bwalu Wèwè udi ne bukolè bwà kumubiisha ku bafwè.”

<sup>33</sup> Nèнку paanyimà pàà cyòci aci, kwambaYè ne: “Mpindyewu, Dimiinu dyèbè nedìkookeshè ciibi cyà mwena lukunà wadi.” Amen! Paanyimà pàà diteeta dimanè kulwa!

<sup>34</sup> Twánjàayi kukenketa àmwè a ku mamiinu a Abraham, mu dimiinu dyà mubidi. Bwalu, twètù leelù tudi Dimiinu dyà nyumà. Kàdi twánjàayi kujandula, ku dimiinu dyà mu mubidi, dyà bàmwè bàà ku bààkiitabuuja mulayi wà Nzambi mu kaabujimà abu, ne kabàyikù beelè mpat- . . . [Katùpà kàà mukàbà wà mèyi munda mutupù—Muf.]

<sup>35</sup> Mémè ne: “Byòbi biinè, cìdi mwànà wa bakàjì mwena Kilistò ùjingila kuleeja cìvùnga cyèndè ncinyi? Ncyèna mwà kuumvwakù aci to.”

<sup>36</sup> Udi mulediibwe cyàkàbìdi, kùdi Nzambi, s'udi ne bulenga bwà Nyumà Mwímpè bwà kuleeja cyùdi aci ne, ki cyùdi. Wèwè's udi ne ngiikàdilù mulenga ùdi bìvùngà byà cilèndwishi ebi kabiyi nendè to. Ncyà bushùwà's. Mukàjì mulelèlè wa Nzambi, udi wimana ne ngiikàdilù mulenga, mbafwànyine kukuseka, ne kukubiikila bu wa cyena-kale; kàdi wèwè udi ne cintu cidìbo

bôbò kabàyi mwà kulenga, ne cikaadibo bamanè kujimija ne kabàyikù mwà kucipeta kabìdi to. Ncyà bushùwà. Wèwè udi ne ngiikàdìlù mulenga. Aci's ki cìdi Nzambi wènda ùkèbangana naaci, ngiikàdìlù mulenga awu. Wamònu anyi?

<sup>37</sup> Kàdi cintu cyà kumpàla, kwôkò mpatà mu meeji èbè, kucyènjiku to nànsha kakesè. Kùlukù mu mulongo wà babèèdì to piikalàku mpatà mu meeji èbè. Kùlukù to pawikalà kùyi ucitabuuya byà kakùyi mpatà, ne dishindika dyônsò, kakùyi divwala mu meeji èbè to, nànsha kakesè, kàdi ànu bwà ne neòndopiibwè, dîbà adi neùmukè pa cibumbà cyà ku cyambilu apa muntu musàngàle. Ncyà bushùwà, pàdiku kakùyi mpatà mu meeji èbè to, nànsha kakesè. Udi ne cyà kwitabuuya Nzambi, kùyi witabuuya byà budingibudingi to. Witabuuya cyà bushùwà!

<sup>38</sup> Ne Dimiinu dyà Abraham didi dicitabuuya bwalu Dîyi ndyambè nànkù, nènku ki bwà cinyi tudi tucitabuuya. Kí nnè bwalu muntu kampànda mmudyulè, bwalu muntu mukwàbò mmwambè nànkù to. Mbwalu Nzambi mmwambè nànkù, aci ncìdi cyènta ne ciikalè Bulelèlè. Pàdi Nzambi ùcyamba, aci ncimanè mpatà yònsò. Yèyè ngudi dîyi dyà ndekeelu. Yèyè ngudi nkàmisha. Pàdi Nzambi wamba cintu kampànda, aci ncikòse bwalu. Kakwèna cintu cikwàbò nànsha cimwè cìdi mwà kwakula cibèngàngana naaCì to. “Dîyi dyà muntu yònsò diikalè mashimi, kàdi Dyanyi Mémè diikalè Bulelèlè.”

<sup>39</sup> Mpindyewu patùdi tukenketa àmwè a ku mamiinu aa apa, twànji twèlààyibi meeji. Tudi tuvùluka bânà bàà beena Ebèlù, bândi naabò mwab'ewu, ngeela meeji ku cyòci aci, ku bânà bàà beena Ebèlù abu, paanyimà pàà bôbò bamanè kuteeciibwa ku dikuukwila dyà lupingù. Mpindyewu, nudi bavùlùke ne, mfùmù awu wákamba ne: “Ewu yònsò wabènga kwina mina lupingù elu awu, nebàmukupè mu cikùtù cyà kapyà.” Mpindyewu, bânà aba bàvwa biitabùùje ne Dîyi dyà Nzambi ndilelèlè, ne kabàvwakù mwà kukuukwila cimfwànyi cyà mùshindù nànsha wùmwe to, kàdi pàakafikàbo ku diteetangana dyà makànda ne kuteeciibwabò ní bàvwa mwà kucyènta.

<sup>40</sup> Dîbà adi, bânà bakwàbò bònsò kuntwaku pàakapetàbo dîyi adi ne kuyabò kakuukwila, bàakaya buludi mu mùshindù wùvwà mfùmù mwambè awu. Bàakalonda meeji a mwasàkànaayi a ditùkù adi, a ne bàvwa ne cyà kucyènta.

<sup>41</sup> Kàdi pàakateeciibwabò bôbò, ní bàvwa mwà kukuukwila mpingù ne kutùpa ku Dîyi dyà Nzambi, bàakashààla ne lulamatu ku Dîyi. Nànsha mwàkenzekà maalù amu, bàakashààla ne lulamatu ku Dîyi. Nènku pàakabàkùpàbo bôbò mu cikùtù cyà kapyà, mulayi wà Nzambi wàkuula. Bàakakòokesha biibi byà mwena lukunà wabò. Nènku kùvwa Muntu mwinâyi mwimàne muntwamu, mwikàle ne nsapi wàkakàngula luuyà kulùùmusha mu kapyà amu, ne kakàyi mwà kwenza cintu nànsha cimwè to ànu kubàshiya badikàdile. Amen.

42 Pàdi mulùme anyi mukàji mudilongòlòle bwà kwediibwa ku diteeta, diteeta dyà ngwengwengwe!

43 Nudi numòna's, byàkakèngela bwà kuyabò mu kapyà. Ne pashìishe pàakayàbo mwòmò, bàvwa mu kapyà amu, kàdi cintu cimwèpelè cyàkenzekà, diteeta dyà kapyà edi, dyàkasùulula ànu—ànu myonji ku byanza byàbò cyanàànà.

44 Misangu yàbûngi, Nzambi ùtu ùtùlekela, patùdi baswika ànu menemene kùdi maalu a pa buloba, baswika, Ùtu ùlekela mateeta a kapyà àtùlwila, bwà kutùkèngelabi bwà kwangata dipàngadika. Ne patùdi twenza nàнку, cintu cimwèpelè cidì diteeta adi mwà kwenza, pàdi Dimiinu dilelèlè dyà Abraham diimàne mu ma—masangu a njila a dipàngadika, nènku yèyè ùdi wàngata dipàngadika dyèndè bwà kukwàcila Nzambi mudimu, cidì ànu mwà kukòsa myonji ne kutùshìya badìkàdile. Sàtaanà mmufwànyine kukupà disaamà. Mmufwànyine kukupà cintu kampànda, cikwàbò. Mmunyi mùdi umanya ne kí n'Nzambi udi mukutèeke mu masangu a njila, bwà kumòna ne ndipàngadika dyà—dyà—dyà mùshindù kaayi diwàngata?

45 Bàakakwàta ciibi cyà kapyà. Kapyà kakàvwakù mwà kubòosha to. Kakùvwakù nànsha mupùuyà wà kapyà pambidi pààbò to, bwalu bàvwa bamanyè ne bàvwa Dimiinu dyà Abraham, nènku bàakatwà ku cyà Nzambi ne Dìyi Dyèndè. Bàakakwàta biibi byà—byà mwena lukunà, ne kapyà kakàvwakù mwà kubòosha to, bwalu bàakakòokesha biibi.

46 Pashìishe, kùvwa muntu, mupròfeta kuntwaku, dìnà dyèndè ùvwa Danyèlè. Yèyè ùvwa . . . wàkeediibwa ku diteeta dyà ne, ní ùvwa ùkwàcila Nzambi mulelèlè umwèpelè mudimu, anyi to. Nènku pàakafikàbi pa dìbà adi, yèyè ní ùvwa mwa kukwàcila Nzambi mulelèlè umwèpelè mudimu, anyi kukuukwila nzambi wa bampàngaanù, yèyè wàkabènga bwà kucyènza; ne ùvwa ùbàndisha maarìdò, ne ùsambila Nzambi wendè, ditùkù dyònsò. Ki kukwàciibwayè bwà cyòci aci, ku cibawu cyà mikenji yà tubàdì twà cinsangànsàngà, ne bàakamukùpa mu bwinà bwà ntambwe. Ki musumbà wà nyama yà ntambwè ne nzala kumulondayi yènda yìkungula. Yèyè wàkenza cinyi? Kukòokeshayè ciibi cyà mwena lukunà wendè. Nyama yà ntambwe ayi kayìvwakù mwà kumudyà to. Nzambi wàkatùma Dikunji dyà Kapyà, Mwanjèlo wàkiimana pankaci pèndè ne nyama wa ntambwe awu.

47 Kukòokeshayè ciibi cyà mwena lukunà, bwalu yèyè wàkateeciibwa bwà kumòna ní ùvwa mwà kukuukwila Nzambi mulelèlè umwèpelè, anyi kwikala ne nzambi dikùmi ne yìbidì yà cimpàngaanù yìvwayè ùkuuwila. Pa nàнку kutàmbayè diteeta adi bukolè, ne kukòokeshayè ciibi cyà mwena lukunà aci. Nyama wa ntambwe awu kavwakù nànsha mwà kumulenga to, bwalu Nzambi ùvwa nendè. Mulayi wà Nzambi wàkashààla mulelèlè, bwalu yèyè ùvwa Dimiinu dilelèlè dyà Abraham.



48 Mòsà, kaa, mukwàbò munène. Wàkateeciibwa pèndè, yéyè awu, bwà kumòna mulayi wùvwà Nzambi mumupèèshe. “Mémè nêngiikalè neebè pawàyà kuntwaku.” Nènku pààkiimanàye kumpàlà kwà batentudi baa dipà dyèndè abu, Yanè ne Yambèlè bàakateeta kukàndamana bwà kutentula cintu ciinè civwà Mòsà mutùmiibwe bwà kwenza aci. Kàdi Nzambi nguvwa mumubiikile, ne yéyè ùvwà mumanyè ne yéyè nguvwa mutùmiibwe ne mudimu bwà kwenza cyòci eci, ne wàkiimana mwaba awu ne wàkenza cishimà mùvwà Nzambi mumwambile bwà kucyènza. Kàdi ki batentudi bàakalwà kwimana aba, bwà kwenza cintu cimwècimwè aci, kàdi aci kacyakatàcisha Mòsà to. Wàkashààla ne lulamatu ku Dìyi dyà Nzambi, ne wàkakòokeshà biibi, amen, byà mwena lukunà abi, bwalu yéyè wàkashààla ne lulamatu ku mulayi wà Nzambi, uvwa uteeta bwà kucitentula awu nànsha mwikàle nganyi.

49 Dileesònà kaayi didi cyòci aci kùdi mwena Kilistò yònsò's wè! Paudi ukènzakana ne umòna mwena lubombo, vùlukà ànu ne yéyè awu ùdi ùteeta kutentula kaabwalu kashùwàshùwàlè kampànda. Kàdi, aci cidi ànu cyùmvwija ne kùdikù kampànda udi mushùwàshùwàlè. Shààla ne lulamatu ku Dìyi dyà Nzambi! Nànsha bibànde nànsha bipwekè, lamà mulayi Wèndè. Èyowà, Danyèlè wàkashààla ne lulamatu ku Dìyi dyà Nzambi.

50 Bàakateeta bwà kumutentula nànsha biikàle búngi munyi, ne bikwàbò byònsò, yéyè wàkashààla ne lulamatu. Ne yéyè ùvwà mulwè mu kiipàcilà kampànda, bwà kupàtula Izàlèèlà mu Èjiipitù, ne kubàbweja mu buloba bulaya. Nènku pàakalwà cikondo bwà kubwelabò mu buloba bulaya, kupàtuka mu Èjiipitù, ki Mbù Mufwè udi mwimàne mu njila wàwa. Ki kukòokeshayè biibi byà màyi awu, ne biibi kuunzulukabi. Ne mà—màyi kwalukilawù paanyimà, ne Mòsà kubwejayè Izàlèèlà mu cipèèlà, too ne ku mukùnà kùvwà Nzambi mumutùme ne mudimu bwà kuyayèku naabò. Amen. Kukòokeshayè biibi byà mwena lukunà.

51 Tatwèndè, Abraham, ùvwà mupetè mulayi awu ne, Dimiinu dyèndè dilelèlà divwa mwà kukòokeshà ciibi cyà mwena lukunà. Nènku biibi byà màyi bìvwà bikànga, ne yéyè kàyikù mwà kupicilamù to, kàdi pààbi aci's ki civwà kajila kàà mudimu. Ùvwà ne cyà kuya ne bânà abu ku mukùnà awu. Nzambi nguvwa mumwambile bwà kucyènza. Ki ciibi civwà ciimàne mu njila cyàcyà, ki kukòokeshayè ciibi cyà mwena lukunà.

52 Yoshùwà, paanyimà ndambù, pàakafikàbo ku Kaadèsà-baanèà, uvwa nkwasa wa cilumbulwidi wa buloba bujimà mu cikondo aci awu, mwaba awu Izàlèèlà kupetayè cilumbulwidi cyèndè. Tudi tusangana Yoshùwà ne Kaalèbà, ne bakwàbò dikùmi ne bàbìdì. . . anyi—anyi bakwàbò dikùmi abu. Umwe mu cisàmbà cyònsò wàkatùmiibwa bwà kuya katentekela buloba bùvwàbo pawipi ne kupeta abu.

53 Kàdi pàakamònàbo bantu baleebàlè bàà mfyondo abu biimàne mwaba awu, dikùmi bàà kùdibo bàakadyùmwva bibi be, kwambabò ne: “Katwèna mwà kubùkwàta to. Mbutàmbe bukolè. Mòna’s, tàngilàayi dikàndameena ditùdi naadi.” Kàdi pàakaalukilàbo bwà kufila mulubù, kutwàlabò mulubù mubi.

54 Bwà cinyi bwàkatwàlàbo mulubù mubi, piikalàbi ne Nzambi nguvwa mubàmbile ne: “Ngaanùpèèshi buloba abu; mbwènù nwènù”? Ùvwa mubàmbile mu Èjiipitù mwàmwa ne: “Ngaanùpèèshi buloba ebu, mbuloba bwìmpè, bùdi ne mabèèlè ne bwìci bituuta nkòkà.”

55 Kàdi pàakamònàbo dikàndameena dikolè, dikùmi bàà kùdibo bàakaalukila e kwambabò ne: “Katwèna mwà kucyènzakù to.”

56 Ùvwa n’Yoshùwà, kupùvwishayè bantu abu, kwamba ne: “Tudi batàmbe ne bukolè bwà kubùkwàta. Tudi batàmbe ne bukolè!” Bwà cinyi? Yèyè ùvwa mutàngile ku mulayi. Ùvwa Dimiinu dilelèla dyà Abraham. Dikàndameena dìvwàku nànsha diikàle dyà bishi ne: “Tudi mwà kukwàta ciibi aci, bwalu Nzambi ngudi mulayè buloba abu.” Ki kukòkeshayè ciibi aci.

57 Pashiishe, pàakapwekàye ne bânà bàà Izalèèlà ku musùlù. Ki musùlù munènè wùwà mwimàne wàwa, mu ngondo mwinàyi, mùle ne mu malèngè. Yadènè ùpweka ùfùmina ku mikùnà, ne ùvwa mupaasàlale mu bibandabanda amu. Bìvwa bimwèke ànu bu cikondo cyà citàmbe bubì, mu cidimu, ciwàye mufwànyine kwikala kuntwaku. Kàdi, nànsha nànkù, yèyè ùvwa Dimiinu dyà Abraham. Ùvwa mumanyè ne ùvwa ne mulayi, ne ùvwa mu njila wa mudimu. Nzambi wàkamupa cikèèna-kumòna, mwà kucyènzayè, ki kukòkeshayè biibi byà musùlù abi. Pàakunzulukà biibi, màyi awu àkaalukila too ne mu mikùnà mwàmwa. Ki Yoshùwà ne Izalèèlà kukòkeshabò biibi byà mwena lukunà, ne kusabukabò e kubwela mu buloba bulaya, bwalu Nzambi wàkabàmbila bwà kucyènza. Dimiinu dilelèla dyà Abraham!

58 Bânà bèètù bàà balùme ne bàà bakàjì, pàakasabukàye e kufika muntwamu, Yelèkò ùvwa yèyè yònsò mwela mu bimanu, bile ne bikumbàne byà bantu biikàle mwà kunyeemenapù ne màkalù a mvità àsàtù mapàlakaja kuulu aku. Mmunyi mùvwàku beena Izalèèlà aba bafwànyine kukumbana ne myelè yà mvità misomba, myangula, ne bikwàbò byònsò, ne bitùpà byà mici ne mabwe, bàvwa mwà kubwelamù bishi? Kàdi yèyè’s ùvwa ànu Dimiinu dyà Abraham. Nzambi kumupèèshaYè cikèèna-kumòna, kumwambilaYè mwà kucyènza, kwamba ne: “Elà mpungi.” Amen. Ki cyòci aci. “Elà lubilà, endàayi batàngile ku lumbu alu, biibi nebyùpukè kumpalà kwènù.” Amen! Yèyè ùvwa Dimiinu dyà bukalenge dyà Abraham. Ùvwa mwena kwitabuuja mulelèla wa Nzambi. “Biibi nebidishindè kumpalà kwènù. Elà wèwè ànu lubilà cyanàànà, kàdi wèlè mpungi. Ki cyònsò cidi

cikèngela bwà wêwè kwenza aci.” Kàdi cyàkenzekà ncinyi? Biibi byàkuupuka, ne Yoshùwà wàkawkwàta cimenga aci.

<sup>59</sup> Pashiishe ndambù, tudi tusangana ne mwena lukunà ùvwa ùya bimpàmbàmba ne ùtùngunuka, paanyimà pàà ciinè aci, ne Yèyè wàkiimanyika too ne dībà mu njila wadi. Ànu mûmvwà ngamba mu dindà adi amu, pa *Cidikà*, Yèyè kwimanyika dībà too ne pààkawkwàtaye biibi byà mwena lukunà wendè. Amen. Ùvwa mumanyè ne mwena lukunà awu yèyè ànu mudidinge mudisangishe cyàkàbìdì, bàvwa babàtangàlaje, ne dībà dikaavwa dyènda dībwela, ne beena Amòlà, ne beena Amàlèkà, ne bakwàbò, bàvwa batangàlake mwònsò amu. Bu bóbò ànu badisangishe cyàkàbìdì, ne badyungwìje, dībà adi bìvwa bimukolela bwà kubàyiishayè cyàkàbìdì bimpàmbàmba. Nènku kùvwa cintu ànu cimwèpelè cìvwà cishààle, cìvwa ncikondo. Ki Yèyè kwimanyika cikondo. Amen! Amen! Kùvwa cintu cimwèpelè cìvwà cìmupangishà mulayi, cìvwa ndībà, bufùki bwóbò bwìnè bucyàmàkàne kumpàla, nènku Yèyè kwimanyika bufùki. Bwà cinyi? Yèyè ùvwa Dimiinu dyà Abraham. Ùvwa mwitàbùje mulayi wà Nzambi. Wàkadiimanyika, e kukwàtaye biibi. Èyowà's, mukalenge.

<sup>60</sup> Bantu banène aba, bwònsò bwàbò's mbantu banène. Kàdi nudi bamanyè's bóbò, yònsò wa kùdìbo, pàvwàbò ànu ne bààfikì ku ciibi cyà lufù, bònsò bàvwa bàfwà. Yònsò wa kùdìbo ùvwa ne cyà kufwà. Bwalu bàvwa bantu banène: “Bààkànga mu—mukana mwà nyama yà ntambwe, ne bààkapànduka ku kapyà, ne ku lusongo lwà myelè yà mvità,” ne bikwàbò, mutùdì bayiilè mu Ebèlù 11. Ne bààkawkwàta biibi byà mwena lukunà, beena lukunà bònsò pa kuumusha umwèpelè, ne ùvwa ndufù. Lufù lùvwa lùmina yònsò wa kùdìbo.

<sup>61</sup> Pashiishe dīngà ditùkù, ki Dimiinu dyà Bukalenge dyà Abraham kulwadi, Yesù Kilistò, Mwànà wa Nzambi; Dimiinu dyà Abraham, ku diitabuuja. Kì nku Izàkà, dimiinu dyà mu mubidi adi to; bóbò abu bààkenza wàbò mudimu. Kàdi ki Ewu uvwa kàyì mulediibwe mu mubidi nyewù kulwaYè. Ki Ewu uvwa kàyikù mulwè ku dijinga dyà disangila dyà mulùmè ne mukàjì kulwaYè. Ki Ewu uvwa mulediibwa kùdì virgò kulwaYè. Mwànà wa Nzambi, Dimiinu dyà Abraham, Muntu munène kaayipu's wè! Bakwàbò bàà mu mubidi bàvwa bònsò balediibwe ku dilediibwa dyà mu mubidi. Ewu Muntu Yèyè wàkalediibwa ku dilediibwa dyà kùdì virgò. CyàkenzàYe ncinyi pààkafikàYe pa buloba? Wàkacimuna mwena lukunà yònsò ùvwa nendè Sàtaanà. Wàkacimuna byònsò.

<sup>62</sup> CyàkenzàYe ncinyi? Wàkapàtuka ne Wàkacimuna bubèèdì. Kakùvwa mwà kwikala bubèèdì pabwìpì Nendè to; kwònsò kùvwa dīsaamà aku, Yèyè wàkadìcimuna. CyàkenzàYe ncinyi paanyimà pàà Yèyè mumanè kudìcimuna? Yèyè kutùpèèsha nsapì, amen, wàmba ne: “Cyònsò cinùdì nuswika pa buloba, Mèmè nènciswikè mu Dyulu.” Kaa! Amen! Ki Dimiinu dyà

Bukalenge dyà Abraham ndyadi, mulayi Wendè. Nyumà Mwimpè munda mwètù mpindyewu, ne nsapì ayi, ùyitèèka kumpàlà kwà disaamà. Wàkacimuna bubèèdi. Bubèèdi kabwèna mwà kutwà nkànàna mu Bwikadi Bwendè nànsha. Ne Yèyè mmwambè ne mMutùpèeshe nsapì bwà kwenza cintu cimwècimwè aci, kucimuna bubèèdi. “Cyònsò cinùdi nuswika pa buloba, Mémè nènciswikè mu Dyulu.”

<sup>63</sup> Kàbìdi, diteeciibwa, Yèyè wàkateeciibwa mu mùshindù wònsò mutwàkateeciibwà twètù amu. CyàkenzàYe ncinyi? Wàkadicimuna. Kàdi cyàkatwàmbilàYe ncinyi? “Nùkandameenè dyabùlù, ne yèyè neànunyeemè.” Wàkatùcimwina bubèèdi. Wàkatùcimwina diteeciibwa, kuupula biibi, kuyènga muteecyanganyi awu nsapi, ne kuyipèesha mwena kwitabuuja, wa ku Dimiinu dyà Abraham awu, e kwamba ne: “Yèyè mukuteetè, ùmukàndamèènè, ne yèyè neàkunyèemè.” Kaa, ekèlekèlè! Kumukàndameena!

<sup>64</sup> Wàkacimuna ne lufù ne ifernò. Wàkabìika ku lufù mu ditùkù diisàtù, wamba ne: “Ngàcimunu. Ne bu Mùndi ne mwoyi, nwènù pèènù nudi ne mwoyi.” Kaa, mulayi kaayipù’s wè! Aci mbwà Dimiinu dyà Abraham. Wàkacimuna lukità, wàkabìika ku lufù mu ditùkù diisàtù, bwà dibingishiibwa dyètù. PààkabìikàYe ku lufù, Yèyè ùvwa dibingishiibwa dyètù. Aci cìdi cìtùvwija cinyi? Wàkacimuna bubèèdi. Wàkacimuna lufù. Wàkacimuna ifernò. Wàkacimuna lukità. Wàkacimuna diteeciibwa. Kaa!

<sup>65</sup> “Mpindyewu tudi batàmbe ne bacimunyi ku Yèyè wàkatùnanga, ne wàkafila mwoyi Wendè awu,” mwikàle Dimiinu dyà Bukalenge dyà Abraham. Biikàle ne Nyumà umwèumwè wa Nzambì awu munda mwètù, uvwa munda Mwèndè awu, tudi batàmbe ne bacimunyi. Mbatùcimwine ciibi cyònsò. Cintu cimwèpelè cìdi cikèngela bwà twètù kwenza nkucikòòkesha. Ncimana kucimuna. Bubèèdi mbucimuna. Lufù nducimuna. Ifernò mmucimuna. Lukità nducimuna. Byònsò mbicimuna, ne twètù tudi balamè nsapì, ku ngàsà Wendè. Wèwè udi uciina bwà kuyèèla mu disòsò adi, wamba ne: “Ndi ndwa mu Dìna dyà Yesù Kilistò” anyi? “Nùlombàayi Taatù cintu kanà cyònsò mu Dìna Dyanyi.” Mémè ndi muMunangè.

<sup>66</sup> Paanyimà pàà bidimu binunu bìbìdi bimanè kupìta, bidimu binunu bìbìdi, kàdi’s n’Yèyè ewu ùcìdi ànu munkaci mwètù, Mucimunyi wa bukòlè wàkapanda cilàmbà cikùdika bipese bìbìdi, wàkangata bubèèdi bwònsò, disaamà dyònsò, byònsò pambidi Pèndè Yèyè mwinè, ne kwambula mateketa ètù e kuya naawù ku nkùrusè, ne mabèèdi ètù ne màsaamà ètù, ne kuàcimuna, ne kubìika ku lufù bwà dibingishiibwa dyètù, ne mushàale ne mwoyi paanyimà pàà bidimu binunu bìbìdi awu, bwà kuDimwènesha bu Yesù Kilistò udi ne mwoyi, munkaci mwà Dimiinu dyà bukcalenge dyà Abraham, bàdi bapyanyi bàà bintu byònsò. Kaa, ekèlekèlè! Aba bàdi paanyimà, bàpicila ku diteeta abu, mulayi wà Dìyi! Bu wèwè mwà kwitabuuja Dìyi, dìbà adi

udi pèèbè Dimiinu dyà Abraham. Mùshindù awu ki wùdi ulwa kùdiDi.

67 Wèwè kùyi mwà kutwàla diteeta dyà Dìyì adi to, dîbà adi wèwè uDyèla mpatà, ne mwoyi mukwàcidile ndambù bwàDì dyôdì, mwikàle mwà kuDìitabuuja ànu ne lutàtu, kùdi cintu kampànda anyì búngà bwalu, wèwè kùyi mwà kuDìitabuuja to, dîbà adi kùlu mu mulongo wà babèèdi to. Ncyèna nànsha mufwànyine kukakùtakanangana ku nyùngulukilu wa cyoshelu to, paùdi kùyi mwà kupeta ngàsà mukùmbàne bwà kumanya ne Dìyì dyà Nzambi ndilelèlà.

68 Kàdi paùdi ànu uya dyàmwàmwà dyà cibwikilu cyà bupidyà aci, dîbà adi udi ne nsapì ayi mu byanza byèbè, yà lufù, yà ifernò, ne yà lukità, bwalu udi ne Mucimunyi Udi mukucimwine. Dîbà adi udi ne Ebèlù 13.8, udi utwàmbila ne: “Yesù Kilistò ùdi umwèumwè awu makèèlèlà, leelù, too ne kashidi.” Tudi mwà kucyènza munyì?

69 Bantu leelù ewu bàdi bàmba ne: “Kaa, èè, nènkwambilè’s, Yèyè udi umwèumwè mù—mùshindù kampànda, mmùdi Ye.”

“Yèyè ùdi umwèumwè awu,” mùdi Bible mwambè.

“Kaa, èè, Yèyè kèna wènza leelù ewu mwàkenzàYe amu to.”

70 Tudi tucìsangana mpindyewu mene, patùdi tumòna Dìyì Dyèndè dishìndika apa. Cìdi cyènza cinyì? Cìdi cìbààlujilaCì buludì bu bujitu bwàbò bwambula. Amen.

71 Dimiinu dilelèlà dyà Abraham dìdi dìCìitabuuja. MbaCìmanyè. Ne Yèyè mmwimàne, dilòòlò edi, mwàkatwilanganàYe ne Abraham mu matùkù a Lotà ne kwenza cishimà aci amu, mwàkenzàYe pa kwambila Sarah cìvwàye mwambè paanyimà Pèndè apu amu. Yesù wàkalaya, Dimiinu dyà Bukalenge dyà Abraham adi, ne Èkèleeziyà neamonè cintu cìmwècìmwè aci pabwìpi menemene ne Dilwa Dyèndè. Ncinyì ciinè aci? Cìdi ne cyà kwenzeka. Nzambi ngudi mucìlayè. Yesù Kilistò wàkacìshìndika ne wàkamba ne bìvwa mwà kwikala nànkù, kàdi’s ki twètù aba leelù ewu, paanyimà pàà bidimu binunu bibidì, tuMumòna munkacì mwètù, mucìkàle ànu Mucimunyi wa bukolè awu! Wàkacìmuna lufù, ifernò, lukità, diitabuuja dyònsò dyà biitàbàatàbà; kwangata Dìyì...?... dyèndè. Eyowà.

72 KwambaYè ne: “Nwènù bashààle munda Mwànyì, ne Méyì Àànyì munda mwènù, nùlombè cinùdi baswè aci ne nebànùpèèshèci.” Cìvwa ncinyì? Dìyì, Kilistò, Dìdì mu mwoyi wèbè adi. “Nwènù bashààle munda Mwànyì, Méyì Àànyì mashààle munda mwènù, dîbà adi nudi bacimùne byònsò bwalu Mèmè ndi munùcimwineci. Nwènù bashààle munda Mwànyì, bu nwènù mwà kuNgumvwa, nwènù mwà kushààla munda Mwànyì. Ewu udi uNgìitabuuja, udi uNgaakidila awu; kacyi ànu kudingidija bu kwìtabuuja to, kàdi udi mwà kwakidila awu. Ewu udi utèeleja Méyì Àànyì, ùmvwa Méyì Àànyì, ne wìtabuuja

Ewu udi muNtùme, ùdi ne Mwoyi wà kashidi; ne kààkubwela mu diteeciibwa, anyi dipiila to, kàdi wàmanyi kuumuka ku lufù ne wàyì ku Mwoyi.” Ki Yèyè awu’s, Mucìmunyi wa bukolè!

<sup>73</sup> S’ki Yèyè ewu leelù ewu, umwèumwè awu makèèlèlè, leelù, too ne kashidi. S’ki Yèyè ewu wènzà kumpàlà kwà Dimiinu dyà Abraham, didi dibìikidìibwe bwà kupàtuka mu Baabùlònà adi, dibìikila bwà kupàtuka mu Sodomà, dibìikila bwà kupàtuka mu maalù a pa buloba, ne ditàpùlùke, dileeja mulayì Wèndè ànu menemene too ne ku ndekeelu. Paanyimà pàà bidimu binunu bibìdi, s’ki Yèyè ewu mwimàne munkaci mwètù, dilòòlò edi, Mucìmunyi wa bukolè awu, Dìyì dyà Nzambì Didi mwà kujingulula meeji àdi mu mwoyi, ne mapàngadika àwù adi. Ncinyì aci? “Dimiinu Dyèbè nedìkookeshè biibi byà mwena lukunà wadi.” Ncinyì aci? N’Dimiinu dyà Abraham, Dimiinu dyà Bukalenge, dìtabuuja Dìyì. Ne Dìyì didi—Dìyì didi Nzambì.

<sup>74</sup> Mpindyewu patùdi tumòna cyòci eci, tudi mwà kwela lubilà lukolè pàmwè naabò, mwàkeelà mwedi wa kasalà wa kale awu ne:

Mu kwikala ne mwoyi, Yèyè wàkannanga; mu kufwà, Yèyè wàkansungila;  
Mujiikìibwe, Yèyè wàkangata mpèkaatù yànyì kuya kayìshiyà kule;  
Mu kubìikà kwà ku lufù, Yèyè wàkambingisha cyanàànà bwà kashidi:  
Dìngà ditùkù Nealwe—kaa, ditùkù dyà butùmbi’s wè!

<sup>75</sup> Muntu kampàndà wàkamba ne: “S’ukààdi ukùlakaja’s, mulùmyànà.” Aci ncyèna mwà kucyèpuka to.

<sup>76</sup> Ndi ne mwoyi kacya ku bwànà bwànyì, cyànyì cimwèpelè cìndiku muswè kwenza nkumònà kwà Dilwa dyà Yesù Kilstò. Ntu mufile mwoyi wànyì bwà kiipàcìlà aku. Ncìcidi ànu mu cyambilu, bu muntu mukùlàkàjì, ndi ngiitabuuja Bwalu bùmwebùmwe abu, ne cintu cyà citàmbe bunène cìndiku mwà kwelela meeji ncyà kumòna Yesù Kilstò ùfuma mu maulu bwà kwakidila Bèndè Sungasunga. Nzambì, dìbà adi wanyì. . . Kabyèna bikèmesha to patùdi mwà kwimba ne:

Bònsò bàsekelelè bukolè bwà Dìnà dyà Yesù!  
Banjèlò bàponè mikookwela;  
Lwàyi ne cifulu cyà butùmbi cyà bumfùmù,  
Ne nùMwasèci bu Mukalenge wa bònsò.

<sup>77</sup> Bwà cinyì? Yèyè m’Mucìmunyi wa bukolè. Wèwè munda Mwèndè, udi mu Dìyì. Yèyè wàkamba ne: “Nwènù bashààle munda Mwànyì, nùlombè cìnùdi baswè.” “Cìnùdi baswè,” bwalu ciibi cyònsò ncimana kucimuna. Dìbà adi tudi mwà kwamba ne:

Bwalu mulayi wònsò mu Mukàndà ngwànyì  
 mèmè,  
 Nshapìta yònsò, mvensà yònsò, ne mulongo  
 wònsò.  
 Mèmè ndi mweyèmène Dìyì Dyèndè dyà  
 buNzambì,  
 Bwalu mulayi wònsò mu Mukàndà ngwànyì  
 mèmè.

<sup>78</sup> Balundà bàanyì, nudikù nujingulula cìdì aci cyùmvwija anyì? Mulayi wònsò wàkapèeshà Nzambì Abraham, mulayi wònsò wàkambiibwà kùdì bapròfetà, mulayi wònsò wàkalayà Yesù Kilistò bwà ditùkù edì awu, Yèyè udi kaaba aka bwà kuwùshindika ne kuleeja ne Yèyè udi ne mwoyi kashidi ne kashidi. “Dimiinu dyèbè nedikookeshè ciibi cyà beena lukunà.”

<sup>79</sup> Pàkaadìbi bikafika ku dībā dyà lufù. Wèwè udi wamba ne: “Kàdì bishi bwà aci?” Wèwè's ucìdì ànu ne Cintu cyàkambà Pòlò. “Wèwè lukitā, bucimunyi bwèbè bùdì penyì? Wèwè lufù, kalonda kèèbè kàdì penyì? Kàdì twasàkidila kùdì Nzambì, Udi utùpèeshila bucimunyi ku Mucimunyi wa bukolè awu, Yesù Kilistò.” Kaa!

Banjèlo bàponè mikookwela;  
 Lwāyi ne cifulu cyà butumbì cyà bumfùmù,  
 NùMwasèci bu Mukalenge wa bònsò.

<sup>80</sup> Dilòòlò edì, paanyimà pàà bidimu binunu bìbìdì, tudì biimàne bwà kuMumòna, mucikàle ànu, Mucimunyi wa bukolè Wàkapanda cilāmbà cikùdika cìvwà citùtāpùlùle ne mulayi kanà wònsò wà Nzambì awu, ne twètù tudì batāmbè ne bacimunyi mu Yèyè. Tùsambilàayi.

<sup>81</sup> Taatù wa mu Dyulu, patùdì biimàne kaaba aka, dilòòlò edì, mu Bwikadi bwà Nyumà Mwimpè apa, Mupèsonà munène wa Yesù Kilistò mu mmwènekèlu wa Nyumà, Wàkalayiiibwa bwà kulwa pa Dimiinu dyà Abraham awu, Dimiinu dyà Bukalenge, tudì tulòmba, Èyi Nzambì, kwòkò mulùme anyì mukàjì, mwànà wa balùme anyì wa bakàjì, mwab'ewu, udi kàyi muKumanyè to, mwikàle ne mpatà ne dilubakana mu meeji èndè, pa bìdì bitāngilā Dìyì dyà Nzambì, bwà ne Didi Bulelèlā anyì to, Èyi Nzambì Munène, Wèwè wàkafila mulayi awu, lwāku dilòòlò edì! Kùdì mulayi munène wùmwpèlè wuWàkafilā, Mukalenge, Wèwè udi mwà kushààla mukwāte ku mulayi awu, Wèwè wākamba ne: “Ewu udi uNgiitabuuja, byenedi bìNdì ngenza neàbyènzè pèndè; yèyè neènzè binène kutāmba ebi, bwalu Nyàaya ku Taatù.” Taatù Nzambì, tudì tulòmba bwà Ushindikèku Dìyì Dyèbè.

<sup>82</sup> Kùdì bààbùngì bàà ku bānà bàà Abraham kaaba aka dilòòlò edì, bàdì bàsaamā. Kaa, dyabùlù nyewù mubākàngile ciibi; mbabèlè munda, ne bakānge ne nsapì, bambè ne: “Mpindyewu udi ne cyà kufwà; udi ne disaamā dyà mwoyi. Udi ne

*cikampànda, cikansanga, anyi cikankènga, nènku udi ne cyà kufwà.*”

<sup>83</sup> Éyi Nzambi, swàku bwà mpungi wa cibilù cyà disànka àdilèku, dilòòlò edi, wa Èvànjeeliyò awu, bwà mupika yònsò àye mudishikàmìne! Yesù Kilistò mmucimùne biibi abi. Tudi bakwàte nsapì mu byanza byètù. Kaa! “Mu Dìna Dyànyi bòbò nebiùpatè baadémons. Nwènù balòmbe Taatù cintu kanà cyònsò mu Dìna Dyànyi, Mémè nèncyènzè. Ewu udi uNgiitabuuja, byenzedi bìNdì ngenza yèyè neàbyènzè pèndè. Dìyi dyà Nzambi nditwè ne didi ne bukolè kupìta mwelè wà mvità wà nseke yìbìdì, wùkòsa too ne ku bwongò bwà mifùbà, ne diikàle mene dijinguludì dyà meeji àdì mu mwoyi.”

<sup>84</sup> “Ne ànu mwàkadìbi mu matùkù a Noà amu, ki mwìkalàbi kàbìdì ku dilwa dyà Mwànà wa muntu, bwalu bàvwa bàdya, bànwà, bàsèlangana, bàsèleshiiibwà; ndongamu minènè yà diibaka.” Ne tudi tutàngila buloba: “Nekwìkalè bimanyinu, bintu byà bikwàcisha bwòwà pa kubimòna mu dyulu kuulu (ebi ntuumàlòngò tùdì tùbùùka), dikanka dyà buloba mu myaba mishiièshiièlàngàne, mbù ùkungula (mavwala a màyi a mbù), myoyi yà bantu yàmba kwimana (bwòwà), dikènga munkacì mwà matùnga, dipampakana dyà cikondo.”

<sup>85</sup> “Ne ànu mwàkadìbi mu matùkù a Lotà, ki mwìkalàbi kàbìdì ku dilwa dyà Mwànà wa muntu.” Éyi Nzambi, lwàku dilòòlò edi ùjèku Dìyi Dyèbè, lwàku dilòòlò edi ùtwe diitabuuja dyà bàna bàà Abraham mushinga. Mu Dìna dyà Yesù Kilistò mmutùdì tulòmba nùnkù. Amen.

<sup>86</sup> Mukalenge ànùbènèshè, mu mùshindù mubanjiike. Ncyàkwenza dibiiikila dyà ku cyoshelu dîbà edi to. Nènnùshiièlèci. Ntu ngeela meeji ne, misangu yàbùngì, dibiiikila dyà ku cyoshelu. . .Ntu ngiitabuuja mùmwe naabò. “Kàdì bùngì bwònsò bwà bàakapetà abu, bàakabàtìijiiibwà.” Mbwena kwamba ne: “Bùngì bwònsò bwà bàakaMwakidilà abu.” Netwìkalè mwà kusambidila babèèdì.

<sup>87</sup> Ndi mufwànyine kwakula mwab’ewu bufùkù bujimà. Nudi batèèleji balenga be. Kàdì cìndì ngamba cìdì ànu muntu wetù ewu; kàdì mémè ngamba Mèyi Èndè, dîbà adi kí mmèyi àànyi mémè to, m’Mèyi Èndè Yèyè. Mémè mwambè cintu kampànda, kàdì Nzambi kàyì ùcìtwa nyama ku mikòlò to, dîbà adi aci cìvwa n’dìyi dyànyi mémè. Mémè mwambè Dìyi Dyèndè, ne Yèyè kuDìtwa nyama ku mikòlò, mmulùme anyi mukàji, mwànà wa balùme anyi wa bakàji kaayi mubiipe, wadidìnga kwasa lwendu kuya wàmba ne kaCyèna nànkù awu?

<sup>88</sup> Yesù, bàakamba pààkenzàYe bintu ebi, bàakamba ne: “Muntu ewu mmwena lubùkù. Ndémon!” Mwena lubùkù, muntu kanà yònsò ewu’s mmumanyè ne lubùkù ndwà dyàbùlù. Bàakamba ne: “Mmwena lubùkù.” Kàdì nukààdikù bamòne mwena lubùkù ùyiisha Èvànjeeliyò anyi? Nukààdikù bamòne





<sup>97</sup> Mwanàànyì wa balùme ùtu ùlwa apa, ànu pánkaadi pa kubwela apu, ne ùcyòmpakaja mushikì wà twartà. Nènku mònaayi mùdìbo, kàmwè *apa* ne kàmwè *pàapa*? Kí mbamanyè to. Udi mufwànyine kupwekela mu *ewu* mulongo ne kupeta ùmwè, ne udi ulonda ùpeta dikùmi, mukwàbò ùpeta makùmi àbidì ne itaanu. Katwèna bamanyè pàdiye to, kàdi, nànsha mwikàle penyì.

<sup>98</sup> Mpindyewu mbùngì kaayi butùkaadi babiikile? Bàtaanu, bànaayi anyi? B, makùmi àtaanu. Cìvwa m'B, makùmi àtaanu, kí mmwòmò anyi? [Muntu kampàndà ùdi wàmba ne: “Eyowà.”—Muf.] B, makùmi àtaanu too ne ku makùmi àtaanu ne itaanu. Makùmi àtaanu ne isambòmbò, makùmi àtaanu ne mwandamutekète, makùmi àtaanu ne mwandamukùlù, makùmi àtaanu ne citèemà, makùmi àsambòmbò. Mpindyewu twànjìbi kumòna, ùmwè, ibidì. . .Tùbalèbi, Billy, nènku netwikalè. . .Makùmi àsambòmbò, makùmi mwandamutekète, bǎnji bàjuukilè kuulu, bu nwènù mwà kuswà. B, makùmi àtaanu too ne ku makùmi mwandamutekète, makùmi mwandamutekète ne itaanu. Tùbalè apu, Mwanèètù Roy, bu wèwè mwà kuswà, pàncidì ngaakula ne batèèleji apa.

<sup>99</sup> Mbanganyi kunùdi aku mpindyewu panùdi batàngile mùshindù ewu apu, bàdi kabàyi ne kartà kàà disambila?

<sup>100</sup> Vùlukàayi ne, Yesù wàkamba ne: “Byenzedi bìNdi ngenza nenùbyènzè pèènù.” Ncilelèlà anyi? Ncilelèlà. Nudi nuciitabuuja anyi? Dimiinu dyà Abraham ndyambè nàнку.

<sup>101</sup> Bible ùdi wàmba, ne: “Yèyè m'Mwakwidi Munène.” Ebèlù, nshapità mwi4: “Yèyè m'Mwakwidi Munène udi mwà kulengiibwa kùdi dyùmva dyà mateketa ètù.” Nudi nuciitabuuja anyi? Piikalàbi ne Yèyè ùdi umwèumwè awu makèlèlèlè, leelù, too ne kashidi, Yèyè mmufwànyine kucyènza munyi?

<sup>102</sup> Kùvwa mukàji mukesè, mu Bible, ànu munùdi numòna cìndi ngamba aci amu. Mukàji mukesè, mu Bible, pàmwàpa kàvwa ne karta kàà disambila to; kàdi wàkamba munda mwà mwoyi wèndè ne: “Bu mémè ànu mwà kulenga Muntu wàwa, mémè's ndi muMwitàbùùje.” Ùkaavwa mutuùle byònsò bìvwàyekù naabi, ku bangàngàbuk-. . .ku bangàngàbukà. Kabàvwakù mwà kumukwàcisha to. Bwalu bwèndè bùvwa bupite bunène. Kabàvwakù mwà kumukwàcisha to. Kàdi ùvwa mwitàbùùje ne Nzambi ùvwa mwà kumukwàcisha. Ki kulengayè luzemba Lwèndè, lwà civwàlù Cyèndè.

<sup>103</sup> Ki Yèyè kwamba ne: “Ndi njingulula ne bukolè mbupàtùke mu Mémè.” Neyà bushùwà anyi?

<sup>104</sup> Nudi nwitabuuja ne Yèyè ùdi umwèumwè awu, dilòlòlò edi anyi? Nudi nwitabuuja ne Yèyè ùdi kaaba aka anyi? Mbanganyi bàdi bìitabuuja ne Yèyè mmubiike ku bafwè? Mpindyewu mmunyi mùdi mwà kujaadika ne Yèyè mmubiike ku bafwè?

105 Abìdì àdì panshì aa, Baptiste kampànda mumanyike mmulwè kùndì, kwambayè ne: “Mwanèètù Branham, mémè’s mvwa mucìmùnyìibwe—mucìmùnyìibwe, musangu kampànda, kùdì Mùzùlùmanyì kampànda wákamba cyôci aci. Yèyè ne: ‘PiikalàYe mubiike ku lufù, Yèyè’s mmulayè ne Ùvwa mwà kwenza cintu cìmwècìmwè aci. TùMumònèbì ùcyènza tǔng.’” Nwamònu’s, bôbò bàdì biitabuuja ne Yèyè kààkabìika to.

106 Kàdì twètù tudi twitabuuja cyà bushùwà ne Ùdì ùcyènza. Tudi twitabuuja ne mMubìike ku bafwè. Kakwèna ntèndeleeleu mukwàbò pa buloba apa udi mwà kujaadika ne mumujuudi udi ne mwoyi to, pa kuumusha bwena Kilistò. Ne mùshindù wùmwèpelè wùdì Nzambi mwà kuCìshìndika, nku aba bàdì bacìitabuujà; bwalu ki mùshindù wùmwèpelè wùdì Nzambi ùkumbaja Méyì Èndè, ng’aba bàdì bàCìitabuujà.

107 Mpindyewu pàcìdìbò bèèla mulongo mukesè wà babèèdì ewu apa, ncyèna mumanyè bùngì butwàngatà to, ndi muswè bwà yònsò wa kunùdì, àlamè mwaba wèndè, àkwatè nkwasà wèndè, kanwikadi nwàtwa eku nwàtwa eku to, tàngilà mu nùnkù ùsambilè, wǎmbè ne: “Mukalenge Yesù, ndi mwitǎbùùje.”

108 Vùlukàayi ne, Yèyè wàkangambila ne: “Wèwè mufikishe bantu ku dikwitabuuja; ne pashiishe mwikàle ne meeji matòòke paùdì usambila.” Aci ncyenzèke mu ditùngà dijimà edi, citwè kumpàla citwè paanyimà, munda mwà bidimu dikùmi ne bitaanu, kaciyi cipangile musangu nànsha wùmwè to. Kacitukù mwà kupangila to.

109 Nzambi, cintu cìmwèpelè cìdì Nzambi kàyikù mwà kwenza, nkupangila. Bikengela Àshaalè mukwàte ku Dìyì Dyèndè. Mémè ndi ngiitabuuja nànkù. Ndi ngiitabuuja nànkù ànu mùdìbì ne ndi. . . kutàmba mùndì ngiitabuuja ne ndi mwimàne kaaba aka, kutàmba mùndì ngiitabuuja ne ndi mu citanda emu; eci ncifwànyìne kwikala màyi a bakishi, ncifwànyìne kwikala cilòòtà. Munda mwà musùukà wànyì, ndi mumanyè ne Yesù Kilistò Mwànà wa Nzambi ùdì ne mwoyi. Ne wèwè bu mùdì Dimiinu dyà Abraham, bu mùdì mufwè mu Kilistò, udi Dimiinu dyà Abraham.

110 Mpindyewu bàdì ne mishwalà ndambù kaaba aka. Cyôci eci ncituutè dyàkalenga dinène, bantu bàdì biitabuujà aba. Mpindyewu twìnyikàayi mitu yètù, pàcìdìbò bàdìlongolola apa, bwà kusambidila byôbì ebi.

111 Taatù wa mu Dyulu, tudi bayiilè mu Bible, ne kùdì bantu mwab’ewu bàdì biitabuuja ne Dìyì dyònsò dyùdì Wèwè mwambè didi Bulelèlè. Mukalenge, mǎngà misangu bôbò bàtu bàtetuka ne bàtuuta bikolè ku disòsò aku, ne nsapi, bàpangila disòsò adi, bàkoonyapù, kàdì biitabuuja ne dìdipù. Bàlekèlèku ànu bàtùngunuka ne kutwà, bôbò nebàdìpetè, bwalu didikù. Ne nsapi awu nnsapi wa cyà bushùwà ne: “Bu wèwè mwà kwitabuuja, bintu byònsò bidi mwà kwenzeka.” Bu

mùdì musambu munkaci mwà kwimbiibwa mpindyewu, anyi kwimbiibwa ku cisanji.

112 Mu Bible bàdi bamba ne: “Pòlò wàkangata mishwalà yà pambidi pèndè ne tulùlù, ne wàkayitùmina babèèdi ne beena ntàtu, ne nyumà yà makooyà yìvwa yùmuka mu bantu, ne bàvwa bòndopiibwa.”

113 Patùdì twakulangana apa, Mukalenge, tudi bamanyè ne Pòlò Munsantu ùdi pàmwè Neebè. Kàdi, kàvwa nyèyè to; ùvwa ng’Wèwè, Mukalenge, Kilistò munda mwèndè. “Ki mmèmè udi ne mwoyi to, kàdi n’Kilistò udi ne mwoyi munda mwànyi,” mwàkambàye.

114 Nènku mpindyewu too ne ku lukòngo elu, Wèwè uci di ànu Kilistò, leelù ewu, m’Úvwa makèèlèlè amu. Nènku pàndi nsambila pa mishwalà eyi apa, mwikàle nyilenga, ndi ndòmba bwà Wèwè kucimuna mwena lukunà yònsò. Bàpèèshèku diitabuuja, bwà kubàfikisha ku dimanya ne mwena lukunà awu mmucimùnyiiibwe.

115 Ne musangu kampànda, Mbù Mukünze, mutwàfùmu ku dicyàmba, ùvwa ùpangisha Izàlèèlè bwà kuya ku mulayi, pààbò bàsanganyiibwa mu njila wa mudimu. Ki mufùndi kampànda kwambayè, ne: “Nzambì wàkatàngila panshì ne mèsù a ciiji, ùtàngidila mu Dikunji dyà Kapyà adi, ki mbù kukwàcikayè bwòwà ne kukàngulayè biibi byènde, ne bòbò kusabuka.”

116 Tàngijàku mèsù panshì, dilòlòlò edi, utàngidila mu Mashi a Yesù Kilistò. Ne swàku bwà, pààtèèkiibwà mishwalà eyi pambidi pàà babèèdi, bwà mwena lukunà àmonè diitabuuja dyètù, dilòlòlò edi, patùdì tubàsambila disambila dyà diitabuuja edi apa. Swàku bwà muntu ne muntu àsungidiibwè, mu Dìna dyà Yesù Kilistò. Amen.

117 Mpindyewu ndi muswè nùmpè maci. Udi ku cikòlokolo eci nì nganyi, udi mufwànyine kucibàndisha dîyi. Bwalu, bu Nyumà Mwîmpè mwà kwenza cyôci eci. . . Ncyèna ngamba ne neÁcyènzè to.

118 Mpindyewu muntu nànsha yèyè nganyi mulwè mwaba ewu ùkwambila mùdiye ne bukolè bwà kwondopa babèèdi, kùcitàbùùjiku to. Bukolè bùdi bwònsò mu Kilistò. Yèyè ki Mucimunyi, kì ngwèwè ne mèmè nànsha. Twètù tudi twitaba ànu cyanààna cidiYe Yèyè mwenzè aci. Muntu nànsha umwe kènàku ne bukolè bwà kusungila anyi bwà kwondopa to.

119 Muntu yònsò pa buloba, mushinga mmumana kufuta. Mushinga mmumana kufuta. Dilòmba ndifuta. Byàkenzeka bishi nànkù? “Wàkatàpiibwa mpùtà bwà kushipa kwètu kwà mikenji, ku mibùndàbùndà Yèndè twàkondopiibwa.” Dyondopiibwa dyèbè—dyèbè ndimana kufucila. Lupandu lwèbè ndumana kufucila. Wèwè udikù ne diitabuuja dyà kulwa, kulwitaba anyi? Ki cyònsò cidiku. Pawikalà Dimiinu dyà

Abraham, udi naadi. Nzambi ngudi mulùlayè. Kùdi cintu munda mwèbè amu cìdì cyàmba ne lùdikù, ne lùdikù.

<sup>120</sup> Mpindyewu dipà ncinyì? Dipà mbwà kupàtuka kuya kwondopa bantu anyi? Bwàlà. Dipà nkudyùmusha wèwè mwinè mu njila, bwà Nzambi àmonè mwà kukwàta neebè mudimu.

<sup>121</sup> Mpindyewu Yèyè wàkalaya aci, cimanyinu cyà ndekeelu, bilondëshile Yesù Kilistò, “Ànu mwàkadibi mu matùkù a Sodomà amu, pabwìpì menemene ne kwoshiibwayè.” Kì nkumpàlà kwà bikwàbò bintu kwenzekabi to, Èvànjeeliyò wàkayiishiibwa kùdi Lotà, ne bikwàbò; kì ng’aci to. Kàdi ànu pabwìpì menemene ne kwoshiibwayè, Nzambi wàkatùuluka mu mmwènèkelu wa muntu, e kusòmba ne Èkèleeziyà musungula awu, Abraham ne kasùmbù kèndè, yèyè uvwa ne mulayi awu.

<sup>122</sup> Mpindyewu vùlukàayi ne, ànu Dimiinu dyà Abraham ndìdì dipetà cyòci eci. “Mu katanci kakesè emu bàà pa buloba kabàakuMmòna kàbidì to,” mwàkambà Yesù. “Nwènù nenùMmònè, bwalu Nèngiikalè neenù, munda mwènù, too ne ku nshìikidilu kwà buloba.”

<sup>123</sup> Kàdi Wàkalaya ne, pabwìpì menemene ne Yèyè kwalukila cyàkàbidì, “Ànu mwàkadibi mu Sodomà,” tàngilàayi nùmonè cìdì Sodomà munkaci mwà kupeta; tàngilàayi nùmonè cìdì Èkèleeziyà musungula munkaci mwà kupeta, mwambè ne, “ki mwikalàbi kàbidì ku dilwa dyà Mwànà wa muntu.” Nzambi mumwènèshiibwe mu mmwènèkelu wa muntu, Mwikàle ne nyimà mwela ku ntentà, wàmba cyàkenzà Sarah munda mwà ntentà amu. Bantu bònso bàdi bamanyè ne aci m’Bulelèlà, elàayi byanza byènù muulu. Aci mmwòmò menemene. Mpindyewu Yèyè ngudi mucilayè. Tukàadi ku cikondo cyà nshìikidilu. Mpindyewu vùlukàayi ne, aci ki cintu cyà ndekeelu cyàkenzekà; ne bàà Bisàmbà byà bendè bàakooshiibwa butùbutù, Sodomà, ne mwànà mulaya wàkamata mu cyalu. Twètù tudi bindile Mwànà mulaya, Mwànà wa Nzambi.

<sup>124</sup> S’ki twètù aba. Nzambi ànùtàbèèjèku mèsù. Ncyèna mumanyè cikwàbò cintu cyà kwamba to. Yèyè ànùtàbèèjèku mèsù.

<sup>125</sup> Mpindyewu Taatù wa mu Dyulu, mèmè ncyèna ne pabwàsà to, ndi ànu cimòtò cyà diima ciWàkafwimbakajà, ne citèeka kaaba aka. Èyi Nzambi, swàku bwà mèmè, dilòlòlò edi, ngiikalèku ne ngàsà ne Bwikadi Bwèbè, bwà ciikalèku Wèwè mufwànyine kukwàta mudimu ne tumòtò tukesè twà diima tÙdì naatù kaaba aka etu. Bwà ne, Mukalenge, aba baÙdì mubiikile ku Mwoyi wà Cyendèlèlèlè abu, ne pàmwàpa kabàyi banjì kuWitabuuja to, bàmonèku milayi eyi. Mbafwànyine kwikala balongeshiibwe ne aci cìvwa bwà ditùkù dikwàbò, kadi’s ncyòci eci mu Bible. Û’Cìshìndikèku, Mukalenge. Aci ki dyumvwija Dyèbè Sungasunga. Kacyèna cikèngela cimwè cintu kupita apu to. Wèwè ànu mwà kucivwija nànkù, dibà adi bòbò nebàmonè

ne Dìyì ndilelèlè. Enzàku nàнку, Taatù. Tudi tudilàmbula kùdi Wèwè.

<sup>126</sup> Muntu yònsò mwaba ewu, Mukalenge, àkwatèku mudimu ne diitabuuja dyèndè, dilòòlò edi. Cidimba cyònsò cyà Cisàmbà cyà Abraham, ku Yesù Kilistò, cìikalèku ne diitabuuja, dilòòlò edi, ne cìitabè Bwikadi Bwèbè. Nènku netùKupè butùmbi. Amen.

<sup>127</sup> Mpindyewu, eci ki ci-...Mpindyewu eci ncyà pabwàci. Ndi muswè bwà nwènu kunkwàcishakù mpindyewu, nùnsambidilèku. Sòmbaayi bapùwe ànu byà menemene ebi, kanwèndakanyi eku ne eku to. Sòmbaayi bapùwe, nusambila.

<sup>128</sup> Mpindyewu, nwamònu's, cìdi cìshintuluka cyùmuka ku butangadiki, ciya ku didiikishishakù mu mùshindù wà ne Nyumà wa Nzambi ùdi mwà kukubweja ànu menemene mu cipaapu cikwàbò.

<sup>129</sup> Mpindyewu ki mwànà ewu mwimàne...Seemènàku ndambù mwab'ewu, inàbànzà. Nènku ànu...Abi mbìmpè, bwà nciikadi ngàlwa kuumuka ku cikòlokolo eci to. Nwamònu's, ncyèna mumanyè cìdi cyènzekà to, nudi numòna's, ne pashiishe misangu mikwàbò, nudi bamanyè...Mpindyewu mùshindù wùmwepelè wùndiku mèmè mucimanyè, cìdi—cìdi pa cikòlokolo, nudi numòna's, ne bàdi bàteeta bwà kucibàkula kuntwaku, ne mèmè nciyi mmanya ne ncinyi to.

<sup>130</sup> Mpindyewu tudi beenyi muntu ne mukwèndè. Mèmè ncyèna mukumanyè to, kacya nciitu mwanjì kukumònakù to kacya bàndela. Kàdi udi mwànà bikolè be kùndi. Ne pàmwàpa tudi balediibwe bashiilàngàne ntàntà wa maakilòmèètà, ne wa bidimu. Ewu mmusangu wètù wà kumpàlà wà ditwilangana. Ncyà bushùwà anyi? Byòbi nàнку, elà cianza muulu bwà batèèleji bàmonè. Mpindyewu, yèyè ùdi ànu muntu mukàjì mwimàne kaaba aka.

<sup>131</sup> Tàngilàayi, cyàlùjaayi mu Mifundu. Twàngatàayi Yone Munsantu 4. Yònsò wa kunùdi àkacìbalè panwàlukilà kumbèlu. Kì—kì nnè mukàjì ewu ùdi mùshindù wà yèyè mukàjì awu to; ncyèna mumanyè to. Ne nudi bamanyè ne mèmè ncyèna Yesù Kilistò to. Kàdi Yèyè ùdi kaaba aka. N'Yèyè. Mpindyewu Nyumà Wèndè ngudi utùlaaba awu, ùdi mwà kusokolola lutàtù lwèndè, mwakasokolwelàYe mukàjì wa ku ciinà cyà màyi awu. Nciitu cìmwècimwè aci.

<sup>132</sup> Nènku, ku cyòci aci, kwàkambà baakwidi ne balombodi bàà ditùkù adi, ne: "Muntu ewu mmwena lubùkù, anyi démon, Beelèzèbùlà."

<sup>133</sup> Mukàjì awu kwambayè yèyè ne: "Mukalenge, ngààjingùlùlù ne Wèwè ewu udi mupròfetà. Tudi bamanyè ne Maasiyà ùlwalwa, ne cyòci aci ki cìikalà cimanyinu Cyèndè."

<sup>134</sup> Mpindyewu, mbanganyi bàdi bamanyè ne aci ncilelèlè? Èè, pìikalàYe umwèumwè awu makèèlèlè, leelù, too ne kashidi, aci

kí ncifwànyine kwikala cimanyinu Cyèndè dilòlò edi anyi? Yéyè wàkalaya ne necyènzekè, ànu pabwípi menemene ne cikondo cyà nshùikidilu anyi? Mpindyewu mònaayi Yéyè ní ùdi ùshààla mulamàte ku mulyi Wèndè kùdi Dimiinu dyà Abraham.

<sup>135</sup> Mpindyewu muntu kampànda mwab'ewu yéyè wèla meeji ne ncyà mafi, lwàku apa wènzè cintu cìmwècìmwè aci. Kabìyi nànkù to, díbà adi kwàmbi cintu nànsha cìmwè pa bwalu abu nànsha. Wèwè udi ne dyèsè adi.

<sup>136</sup> Mpindyewu, mu Dìna dyà Kilistò, ndi ngangata nyumà ne nyumà yònsò mu bukòntononyi bwànyi mèmè, bwà butumbi ne luumù lwà Nzambì.

<sup>137</sup> Nebikengelè ànu bwà nyiikilangànekù neebè, katanci, wèwè nsongàakàji. Nudi bamanyè's, Mukalenge wetù's wàkayiikilangana ne mukàji wa ku ciinà cyà màyi awu. KwambaYè ne: "Ntwàdìlèku màyi a kunwà." CìvwàYe wènza aci ncinyi?

<sup>138</sup> Mpindyewu tàngilàayi, Yéyè mmwambè, mu Yone Munsantu 5 ne: "Bulelèlè, bulelèlè, Ndi nnwàmbila ne, Mwànà," ùvwa n'Yéyè awu, mubidi, "ncyèna mwà kwenza cintu nànsha cìmwè mu Mèmè mwinè to," ànu mùdiYe mumòne Taatù wènza amu. "Cidi Taatù wènza, ncidìYe ùleeja Mwànà. Nwamònu's, Ncyèna mwà kwenza cintu nànsha cìmwè mu Mèmè mwinè to, ànu pàNdi mmòna Taatù ùcyènza." Díbà adi, Yesù kààkenzakù cishimà nànsha cìmwè pàvwà Nzambì kàyi mwanji kuMuleeja ku cikèenà-kumòna to; Yéyè kàvwa ùMwambila ku dicì to, kàdi ùvwa ùMuleeja. "CìNdi mmòna," kí ngumvwa to, "ùmòna Taatù wènza." Kì cyàkaMuvwijà Mupròfetà mufwànàngàne ne Mòsà ncyòci aci, mwàkambà Mòsà. Mpindyewu pàvwàYe—Yéyè mumanyè Taatù. . . Ùvwa pa. . .

<sup>139</sup> Ùvwa ùya ku Yelèkò, kàdi bìvwa bìkèngela bwà Àpicilè mu Sàmaalèyà, nènku kulwaYè pabwípi ne cimènga cyà Suukà. Kàdi mpindyewu mònaayi ne, beena Sàmaalèyà bàvwa bindile Maasiyà.

<sup>140</sup> Beena Yudà bàvwa bàcìndile, ki Yéyè kubàleeja cimanyinu Cyèndè. Filipò, Nàtànàèlè, Peetèlò, dyà cimanyinu aci cyènjiibwa anyi, kwambabò ne: "Wèwè udi Mwànà wa Nzambì."

Laabi yéyè kwambayè ne: "Muntu ewu m'Beelèzèbùlè."

<sup>141</sup> Kàdi mpindyewu vùlukàayi ne, bàà Bisàmbà byà bendè, twètù's, tuvwa ba-Anglo-Saxons, katùvwa—katùvwakù bindile Maasiyà to. Twètù tuvwa bampàngaanù, beena Loomò, ne bikwàbò. Katùvwakù bindile Maasiyà to. Yéyè ùdi ùlwa ànu kùdi aba bàdi baMwindile.

<sup>142</sup> Kàdi beena Sàmaalèyà bàvwa baMwindile, pa nànkù byàkakèngela bwà kupicilaYè kùdibo, ku Sàmaalèyà. Yéyè kusòmba ku ciinà cyà màyi. Inàbànzà mutekète, pàmwàpa wa bukolé bwèbè abu, ki yéyè ewu pwàà. Ùvwa mukàji wa luumù

lubì. Nukàadi babalè bwalu abu, ngeela meeji. Ki kwamba Yè ne: “Mukàji, Ntwàdiléku mâyi a kunwà.”

143 Yèyè ne: “Kaa, kacitu cilèlè to, bwà Wèwè ewu mwena Yuda, ulòmba mwena Sâmaalèyà cintu bu nàнку.”

144 Yèyè ne: “Kàdi bu wèwè mumanyè ne mwìnè ùdi wakula nendè ewu Nganyì, wèwè’s nguvwa mwà kundòmba Mémè mâyi a kunwà.”

145 Muiiki kutùngunukawù. Ndekeelu wa byònsò, Yèyè kujandula pàvwà lutàtù lwèndè. Nudi bavùlùke ne cìvwa ncinyi anyi? Ùkaavwa ne balùme bapitèpite búngi. Ki Yèyè ne: “Ndà ùkangàtè bàyeebè, ùlwe mwab’ewu.”

Awu ne: “Ncyèna nendè bwalà.”

146 Yèyè ne: “Wambì bímpè,” Yèyè ne, “bwalu ukààvwa naabò bàtaanu, kàdi ùdi musòmbè nendè mpindyewu awu kí ngwebè to.”

147 Yèyè ne: “Mukalenge, ndi njingulula ne Wèwè ewu udi mupròfètà. Twètù tudi bamanyè ne Maasiyà ùlwalwa, Yèyè ngwatwàmbila maalu aa.”

Ki Yèyè ne: “Mémè ki Yèyè awu.”

148 Kushiyaye mulòndò wendè wa mâyi awu, kubwèlaye lubilu mu cimenga, ne wamba ne: “Lwâyi, kanùmonàayi Muntu Udi mungambìle bìndi mwenzè. Kí m’Maasiyà awu anyi?” Kabàvwa bapètè mupròfètà to kùkaavwa bidimu nkàmà. Kàdi ki Muntu nyewù uvwa udyàmba ne m’Maasiyà, ne ùjaadika ne ùvwa mu—mupròfètà, ne ùleeja cimanyinu cyà Maasiyà.

149 Ncifwànyìnekù kukufikisha ku diitabuuja cintu cìmwècimwè aci, Yèyè mwenzè cintu cìmwècimwè aci, bu mùdi Yè umwèumwè awu makèlèlè, leelù, too ne kashidi, ne mulayè ku Mifundu ne Ùwà mwà kucyènza anyi?

Ncifwànyìnekù kufikisha batèèleji ku diitabuuja anyi?

150 Wèwè udi usaama disaamà dyà twonyi. Aci nì ncyà bushùwa, elà cianza muulu.

151 Aci cidi misangu yònsò ànu cìtùpika kumpàlà kwànyì bwà cinyi? Muntu kampàndà ùdi wamba ne: “Aci wàcibùku.” Ncyèna mubùkekù aci to.

152 Mòna, yèyè mmukàji wa maalu mímpè. Udi ungiitabuuja anyi? Mpindyewu wèwè udi mumanyè ne ncyènakù mubùke aci to. Twàmbèbi cikwàbò cintu. Bàyeebè ùdi neebè. Ùdi ùsaama, yèyè pèndè. Kí mmwòmò anyi? Dìsaamà dyà dinungu dyà mwongo. Aci ncyà bushùwà. Kí mmwòmò anyi? Udi ne mwànà mukèsè wa balùme pàmwè neebè. Ùdi ùsaama, yèyè pèndè. Udi ukèba bwà bàmusambidilè. Ùdi ne cintu cìmutàcisha mu mèsù èndè amu. Ncyà bushùwà. Wèwè udi ne mwànà mukèsè wa bakàji pàmwè neebè apu, ùdi ne disaamà dyà twonyi, mùdi wèwè naadi amu. Aci ncyà bushùwà anyi? Mpindyewu nwènù bònsò nudi



mwà kuumvwa bîmpè, nwènù biitàbùùje. Udi ucìitabuuja anyi? Nzambi àkubènèshè. Kwàta njila ndàaku ùmvwè bîmpè.

153 Nudi nwitabuuja anyi? Yèyè udi umwèumwè awu makèèlèlè, leelù, too ne kashidi. Ncinyi aci? CidiYe ùteeta kwenza aci ncinyi? Bwènù nwènù, Dimiinu dyà Abraham, Yèyè ùdi munkaci mwà kunùleeja ne Kí mmufwè to. Mémè kí ngudi mwà kwenza bintu abi to. Yèyè kí mmufwè to. Kàdi Ùdi ne mwoyi, mwikàle ùnùleeja ne nudi ne bukenji bwà kukòokesha biibi byà mwena lukunà wenù. Aci's bìvwa bikèngela kukòsaci bwalu.

154 Inàbànzà ewu, anji vwilà eku, katanci kakesè cyanààna. Twètù, tudi bu beena mulongo, ngeela meeji. Kàdi tudi—tudi beenyi muntu kùdi mukwèndè, bwà ku dyànyi pàanyi dimanya. Mémè ncyèna mukumanyè to, ne tudi beenyi. Ncyèna mumanyè kantu nànsha kàmwè kàà kùdi to. Aci ní ncyà bushùwà, elà cyanza muulu, wamònu's. [Mwanèètù wa bakàji awu ùdi wàmba ne: “Ncyà bushùwà.”—Muf.] Mbakupèeshe pèèbe ànu kartà kàà disambila, kàdi's ki wèwè awu. Èyo. Mpindyewu bu Mukalenge Yesù. . .

155 Bu mémè, pàmwàpa, ngamba ne mvwa nkèba bwà kwangata kaaba kàà Mwanèètù Oral Roberts, anyi umwe wa ku bantu banènè bàà diitabuuja abu, mvwa mufwànyine kwamba ne: “Inàbànzà, cidi cikutàcisha ncinyi?”

156 Wèwè uvwa mufwànyine kwamba ne: “Èè, ndi ngumvwa *cikampànda*.” Mpindyewu, yèyè mmufwànyine kwikala kàyi mu bulelèlè to. Wamònu anyi? Ncyèna mumanyè to. Wamònu anyi? Kàdi, yèyè, wèwè uvwa mufwànyine kumwambila ciwà lutàtù alu.

157 Yèyè ùvwa mufwànyine kukutentekela byanza, kwamba ne: “Nzambi ngudi muntume bwà—bwà kusambidila babèèdi. Udi witabuuja nàнку anyi?” “Èyowà.” “Butùmbi kùdi Nzambi! Ndàaku, cìtàbùùjè.”

158 Bidi ànu bîmpè. Bidi ànu bîmpè. Aci ncidi Nzambi mulayè. Kàdi, nudi numòna's, twètù tudi ne mwoyi kule ndambù mu di—ditùkù kupita ne apu. Yesù wàkalaya ne: “Ànu mwàkadibi mu matùkù a Sodomà. Byenzi bîNdi ngenza nenùbyènzè pèènu.”

159 Mpindyewu bu Nzambi mwà kungambila cyúvwà, s'udi umanya ne ncilelèlè anyi kí ncilelèlè. Yèyè ùdi mwà kukwambila ciwìkalà. Nènku pìikalà aci cilelèlè, eci necìikalè pàaci cilelèlè. Yèyè mukwambile, ní ncinyi cyònsò, mémè ncyèna mumanyè to; kàdi bu Yèyè mwà kungambila cidi lutàtù lwèbè.

160 Nenùcìitabuuje pèènu anyi, nwènù batèèleji aba?

161 Bìvwa cyà bushùwà bikèngela ngiimanyikè. Musangu wùmwe awu, muntu uvwa kaaba aka kùkaadi katanci awu, s'bìvwa bikèngela bwà aci kucìshìndikaci's. Yesù wàkacyèna musangu wùmwèpelè. Kaakacyènzakù cyàkàbìdi to. Bantu bònsò mu Suukà bàakacìitabuuja, bàakiitabuuja bujaadiki

bwà mukàji awu, pàakalwàye, kubàmbila, kàdi pèndè's ùvwa mukàji wa luumù lubi. Mwena Kilistò's wáfumu ku dyumuka pa cibumba cyà ku cyambilu, kumpalà kwènù nwènù bònsò aba! Amen. Kàdi bu mùdìbi ne dībà dikaadi dipite kutàmba ne mutùdi twètù twelela meeji, Mukalenge àtungunukèku ne kuDijaadika, Mucimunyi munène wa bukole awu, bwà ne Dimiinu dyà Abraham. . . Kàdi mùvwàbi bwà Abraham, Yéye wákacyenzela Abraham, musangu wùmwe; pashiishe kubùtula cyôci aci, ne kucyènza cyàkàbidì. Abraham ùvwà mutungùnùke ànu ne kwitabuuja Nzambì.

<sup>162</sup> Kwèna mulwè apa bwèbè wèwè mwinè to. Udi kaaba aka mbwà muntu mukwàbò, ne nnyinàbànza kampànda. Mmwanèènu wa bakàji. Ne inàbànza awu mmubwikila kùdi mundidimbì wa lufù. Ne ùdi ùsaama dìsaamà dyà—dyà nsùkaadi. Ne yéye kí ngwa mùnèemu to. Ngwa mu. . . Ngwa mu Louisiane, ditungà dyà bisènsè. Aci. . . Kàdi cikwàbò cintu ncyôci eci, bwà batèeleji bàmányè cyôci eci. Wèwè udi ne mwanèèbè wa bakàji udi usaama bikolè, ùdilongolola bwà kulwa mu disangisha edi, ne ùdi ne ciseki. Ncyà bushùwà. Aci ncilelèlè. Kí mmwómò anyi? Udi witabuuja mpindyewu anyi? [Mwanèètu wa bakàji awu ùdi wàmba ne: “Éyowà. Amen.”—Muf.] Wèwè ní udi Dimiinu dyà Abraham, cītàbè kàdi ùpatukè, ne wòndopiibwè mu Dìna dyà Yesù Kilistò.

<sup>163</sup> Nudi nwitabuuja anyi? Cyà bushùwà's. Vùlukàayi ne, mmulayi Wendè. Yéye ngwákamba ne Ùvwa mwà kucyènza. Útu ùshàala mukwàte ku mulayi Wendè.

<sup>164</sup> Wetwàwu! Tudi beenyi muntu kùdi mukwèndè. Mémè ncyèna mukumanyè to. Kàdi Nzambì mmukumanyè. Udi witabuuja bu Nzambì mwà kunsokolwela lutàtù lwèbè, dībà adi udi umanya ne cidi ne cyà kufùmina kùdi bukole kampànda bwà nyumà. Mpindyewu, kùdi bintu ànu bibidì kùdici mwà kufùmina, byùdi mufwànyine kudifwànyikijila. Pàdici cyènzeka, nciàmbe dyumvwija kule ne kule, bwalu ncintu cyà cikèmesha. Nènku, kàbidì, ncidikà; cintu kampànda, èè, cyà kaciyi kufwikàkaja mu lungènyi, kàdi pàaci cilelèlè's. Ncifwànyine kwikala cidikà. Nènku mpindyewu udi mucimanyè, ne ncilelèlè anyi kí ncilelèlè, neumanyè ní mMukwambile bulelèlè.

<sup>165</sup> Mpindyewu, vùlukà ne, mémè ncyèna mukumanyè to. Cidi ne cyà kwikala Kampànda udi kàyi mémè to. Wèwè mwenzè bu Báfàalèsà, bákambà ne: “Kaa, s'nyumà mubi's,” dībà adi udi upeta difutu adi. Wèwè mwtàbùùje ne n'Kilistò, udi upeta difutu Dyèndè. Cidi cyènza ne ùcītàbùùjè, mbwalu Yéye ngwàkacilaya bwà ditùkù edi, ne kí ncyenzèke to kuumukila ku cikondo aci too ne ku eci. Aci ncidì cicyènza cikondo cyà nshìkidilu.

<sup>166</sup> Kùdi muntu udi anu mutungùnùke ne kumwènèka kumpalà kwèbè, dībà dyònsò. Mmuntu mulùme, wa mvya. Mbàyeebè.

Mmusòmbe ànu mwaba awu mene. Ùdi ùteeta bwà kwitaba dyondopa dyèndè, mubwikila kùdì mundidìmbì wà kànsèrè, cyùjà, cyà kànsèrè. Ùdi ne disaamà dyà twonyi, disaamà dyà kalòndò kàà mēnyì. Nudi Mukalenge ne Māndāmù Little. Ncyà bushùwà anyi? [Mwanèètù wa bakàji ùdi wamba ne: “Èyowà.”—Muf.] Itàbùùjà ne mwoyi wèbè wònsò, nēnku wòndopiibwè.

167 “Udi wamba dīnà dyèndè, dīnà dyàbò anyi?” Mōna’s, cyà bushùwà’s. Yesù kàākambilakù Peetèlò ne: “Dyèbè n’Simonà, mwānà wa Yona” anyi?

168 Muntu mulùme nyèyè ewu. Tudi beenyi muntu kùdì mukwèndè, mukalenge. Mémè ncyèna mukumanyè to. Kàdi wèwè udi muntu mulùme, ànu bu—bu mùvwà Peetèlò mwikàle ùlwa kùdì Mukalenge Yesù amu, twatwidyanganyi. Udi witabuuja ne mémè ndi musadidi Wendè anyi? Udi witabuuja ne cingàākwanbidì aci mbulelèlè anyi? [Mwanèètù wa balùme awu ùdi wamba ne: “Èyowà’s, mukalenge. Ndi ngiitabuuja’s, mukalenge.”—Muf.] Bu wèwè mwà kuciitabuuja’s! Mémè, kwòkò cintu cīndiku mufwānyine kukwenzela, mvwa mufwānyine kucyènzà, kàdi kakwèna cintu nānsha cīmwè cīndi mwà kwenzà to. Yèyè ùkaadi mumanè kucyènzà; cidi ànu cintu kampānda bwà kukufikisha ku diciitabuuja. Nēnku, nwamònu’s, kī ncifwānyine kwikala mémè to. Bu ne ùvwa mmémè, nūnku mvwa—nūnku mvwa mwà kwenza cyònsò cīmvwà mufwānyine kukwenzela aci. Kàdi Yèyè mmumpèèshe dipà kampānda, ne mémè ndi ànu ndilekelela kumpālà Kwèndè, ne Yèyè ngudi wākula. Udi witabuuja nānku anyi? [“Èyowà.”]

169 Nudi nwitabuuja nānku anyi, nwènù batèèleji?

170 Mvwa njinga kupeta muntu mulùme kampānda. Wèwè udi ne bintu byàbūngì bidì bìkutàcisha. Kàdi cīmwè cyà ku bintu abi cidi ne, udi ne cyùjà mu dīsù dyèbè dyà dyàbalùme amu. Ki lutātù lunènè lūdi naalù ndwòlò alu. Cikwàbò cintu ncyeci, mukàji kampānda mmutùngùnùke ànu ne kumwèneka kaaba aka. Mmukàjèèbè. Udi witabuuja ne Nzambì ùdi mwà kungambila cidi citàcisha mukàjèèbè ewu anyi? Lutātù lwèndè lūdi mukana mwèndè amu. Mmènù èndè awu. Aci ncyà bushùwà. Udi witabuuja ne Yesù umwèumwè awu, Wākamanya ne Simonà Peetèlò ùvwa nganyi awu, mmufwānyine kungambila ne wèwè udi nganyi anyi? [Mwanèètù wa balùme awu ùdi wamba ne: “Èyowà.”—Muf.] Ncifwānyine kukwitabuujiya bikolè menemene anyi? [“Èyowà’s, mukalenge.”] Mmwòmò anyi? [“Èyowà.”] Oscar Barnes. [“Ncyà bushùwà.”] Ncyà bushùwà anyi? Kwata njila alùkilà kwèbè kumbèlù, òndopiibwè.

171 [Katùpà kàà mukàbà wà mēyi munda mutupù—Muf.] . . . mwenyi kùdì. Mémè ncyèna mukumanyè to, kàdi Nzambì mmukumanyè. Udi witabuuja ne Yèyè ùdi ne bukolè bwà kungambila cidi lutātù lwèbè anyi? Udi mufwānyine

kuciitabuuja ne mwoyi wèbè wònsò anyi? Lutàtù lwèbè lùdi lwà pa muminu wèbè apu, ne mu cyàdi cyèbè emu. Ndi—ndinyanguka dyà mifùbà. Udi munkaci mwà kupeta mapondo, byà nàнку awu, ne dikàyabala dyà munda mwà nsànjisànji wa mifùbà. Ncyà bushùwà. Kwèna wa muneemu to. Udi mu ci—cimenga cidi ne micì yà bimuma byà oranges mu nyungulukilu mwàci mwònsò. Cidi cisanganyiibwa mu cibandabanda, ne mmwènekèlu wa mikùnà kacya ànu yàya paanyimà pààci apu. Mùdi cilààla-beenyi cibiikidiibwa ne Antlers. N’San Bernardino. Ki mùdi mufùmìne. Alùkilà, Yesù Kilistò ùdi ùkusàngaja, wèwè mwitàbùùje.

<sup>172</sup> Kùdi cintu ànu cimwèpelè cidiku mwà kwondopa kànsèrè, n’Nzambi. Udi witabuuja ne Yèyè neàkondòpè anyi? [Mwanèètù wa balùme awu ùdi wàmba ne: “Ncyà bushùwà ne ndi ngiitabuuja.”—Muf.] Cìtàbùùjè! Ndààkù, ne Mukalenge Nzambi àkwondòpèku mu kaabujimà.

<sup>173</sup> Ànu matùkù makesè aa wèwè kulwa mu- . . . mubindùlùke biyè ne mwà nàka, mutàcishùbwe byà bibi. Ku dibinduluka edi, cifù cyèbè kufika mu mùshindù kampànda. Kùcyèna upicisha byàkudyà byèbè bwà kubyàndamuna mashi to; ukàadi ubyàluja mukana. Ng’acide ukàadi mukana mwèbè mwònsò amu. Mèbà a mu mapingaja, udi ulwa mucyòke bikolè ne bikwàbò byònsò. Udi ne cyùjà cyà mu cifù. Udi witabuuja ne n’Yesù Kilistò udi mwà kukwambila aci awu anyi? [Mwanèètù wa bakàji awu ùdi wàmba ne: “Èyowà.”—Muf.] Nènku, ndàaku ùkadyè cyàkudyà cyèbè cyà dilòdò. Itàbùùjà ne mwoyi wèbè wònsò, Yesù Kilistò ùdi ùkusàngaja.

<sup>174</sup> Wetwàwu! Kùdi bintu byàbùngì be bìdi bitàcisha. Kàdi cimwè cyà ku bintu abi cyùdi naaci bwòwà, newikalè mwà kushààla mucibùkile panshi bwà binyoka. Kàdi udi witabuuja ne Nzambi neàkwondòpè, àkusàngàjè ku cyòci aci anyi? [Mwanèètù wa bakàji awu ùdi wàmba ne: “Èyowà.”—Muf.]

<sup>175</sup> Mukalenge Yesù, ndi ndòmba bwà Ùcipèeshèku mwanèètù wa bakàji ewu. Mupèeshèku lumònò lwèndè. Muumùshèku disaamà dyà bânà bakàji adi, ne ondòpàku binyoka abi, mu Dìna dyà Yesù. Amen.

<sup>176</sup> Ndàaku mpindyewu, mwitàbùùje. Yèyè neàcyènzè, ne nebùikalè bimpè. Kwèdi mpatà to, túngunukà ànu ne kwenda, ne itàbùùjà ne mwoyi wèbè wònsò.

<sup>177</sup> Disaamà dyà mwoyi ncintu cibi be, kàdi Kilistò ùdi wòndopa mwoyi. Udi witabuuja nàнку anyi? [Mwanèètù wa bakàji awu ùdi wàmba ne: “Èyowà.”—Muf.] Ndàaku, cìtàbùùjè, ne byònsò abi nebyènzekè. Byàjikì.

<sup>178</sup> Udi witabuuja ne newikalè mwà kushààla mucibùkile panshi anyi? To, nànsha mèmè, ncyèna ngeela meeji nàнку to. Aànyi meeji, binyòka; mundidìmbi awu mwaba awu, kaa, aci’s nkànsèrè. Udi witabuuja ne neÀkòndòpè anyi? [Mwanèètù wa

bakàjì awu ùdi wàmba ne: “Èyowà, ndi ngiitabuuja.”—Muf.] Ndààku, cìtábùùjè. Yèyè neàkusàngàjè.

179 Ncikutàcìshètàcìshe be, katanci cyùmuka, katanci cìpàcìsha mwoyi. Kàdi udi witabuuja ne necìjìkè, dilòlò edi anyi? Ndààku, cìtábùùjè, Yesù Kilistò neàkusàngàjè.

180 Cìtu lutàtù lukesè, lwà ku disaamà dyà bânà bakàjì, kùkaadi ntàntà mule. Ne pashìishe, wèwè udi, utu ne lutàtù lukolè bwà kujuuka kuulu mu dindà. Udi udyùmvwà misunya yikumakana, mu mikòlò amu. Utu mwà kwenda ànu ne lutàtù, too ne mundaamuunya, bwà cikondo kampànda. Mbinyòka. Ndààku, kwèdi mpatà to, kwàkwikala kàbidì naabi to. Cìtábùùjè wèwè ànu cyanààna, ne mwoyi wèbè wònsò.

181 Udi ne bintu byàbùngì, ntàtù mikòdyàkànàngàne. Kàdi cintu cìmwèpelè cidì cikutacìsha bikolè menemene, udi pèèbè wela meeji ku binyòka, bwalu mbyòbì, bwà ne nebikushiyè mucibùkile panshi. Udi witabuuja ne Yèyè neàkwendèshè kuulu ne neàkusàngàjè anyi? [Mwanèètù wa bakàjì awu ùdi wàmba ne: “Èyowà’s, mukalenge.”—Muf.] Ndààku, cìtábùùjà ne mwoyi wèbè wònsò, Yesù Kilstò neàkusàngàjè.

182 Mwoyi ùbìnduluka, ne binyòka, kàdi udi witabuuja ne Nzambì neàkusàngàjè anyi? Udi witabuuja anyi? Ndààku, nènku Mukalenge Yesù àkusàngàjèku.

183 Ncyà bushùwà ne cifù aci ncikupè lutàtù bùngì cyanààna mu ndambù wa bidimu bishààle ebi, kí mmwòmò anyi? Kacyàkukutàcìshakù kàbidì to. Ndààku, cìtábùùjè. Nzambì àkubènèshè. Ondòpiibwà.

184 Wèwè pèèbè, udi mwà kwondopiibwa, cifù cyèbè aci cyòndòpiibù. Ndààku, itàbùùjà ne mwoyi wèbè wònsò. Kwèdi mpatà to.

185 Udi utàta be bwà kweyela, disaamà dyà mfwènkè dyà kale adi ditu dikutèekela panshi, kí mmwòmò anyi? Udi witabuuja ne necyùmushiibwè mpindyewu anyi? [Mwanèètù wa balùme awu ùdi wàmba ne: “Èyowà.”—Muf.] Èyo, ndààku ùcìtábùùjè. Amen.

186 Àlèluuyàh! Udi witabuuja ne mwoyi wèbè wònsò anyi?

187 Anjì indilaayi kakesè. Kanwènaayikù numòna Bukènkè bwàbwa anyi? Inàbànza mutekète wa bafiike kacya ànu wàntàngila, musòmbe ànu lwà kaaba aka, ùdi ne cyùjà mu lubadi lwèndè lwà dyàbakàjì amu. Udi ne disaamà dyà twonyi, ntàtù mikòdyàkànàngàne. Wèwè uvwa ne diitabuuja dyàbùngì. Kabyèna bikèngela bwà wèwè kubànda kùneeku nànsha. Byàjìkì. Cìtábùùjè wèwè ànu cyanààna. Amen. Ikàlà ne diitabuuja kùdi Nzambì!

Udi witabuuja nànu anyi?

188 Udi witabuuja anyi, mwanèètù wa bakàjì, ne neùmvwè bìmpè ku disaamà dyà mwongo adi, wèwè udi musòmbe mwab’awu? Udi witabuuja ne Yèyè neàkusàngàjè anyi? Èyo.

Kùcyédiku mpatà to, nènku udi mwà kucìpeta bu wêwè ànu mwà kucìtabuuja.

<sup>189</sup> Muntu udi musòmbe apa ewu, muntàngile, ùdi ùsaama disaamà dyà mpàcì wa mēnyì, ùjuuka bufuku ne bikwàbò. Udi witabuuja anyi, mukalenge? Nènku, necijiké, wêwè mucìtábùùje.

<sup>190</sup> Ki muntu mulùme wa bafiike udi musòmbe apa ewu, muntàngile. Udi ùsaama ciseki. Udi kàbìdi munkacì mwà kukèba dibàtiiza dyà Nyumà Mwímpè. Juukilà kuulu, mukalenge, itàbà dyondopiibwa dyèbè. Nzambì àkupèèshèku dibàtiiza dyà Nyumà Mwímpè. Amen.

<sup>191</sup> Musòmbe ànu mutàngilàngàne neebè, kùdi mwànà musòmbe mwaba awu, udi pèndè ne ciseki, byenzè bu udi uminyina ku dipaluka, musòmbe mwaba awu, ku luseke lukwàbò aku. Udi witabuuja ne Nzambì neàsangajè mwànà awu, mwaba awu anyi? Udi witabuuja ne mwoyi wèbè wònsò anyi? Nànku Nzambì neòndopè mwànà awu.

<sup>192</sup> Nudi nwitabuuja anyi, muntu ne muntu wa kunùdi? Yèyè kèna—Yèyè kèna—Yèyè kèna bulelèlè Dimiinuu dyà Bukalenge dyà Abraham anyi? Yèyè kì m'Mucimunyi wa bukolè anyi? Yèyè ngwàkalaya ne nwènu nuwua mwà kukòokesha biibi byà mwena lukunà anyi?


<sup>193</sup> Mbanganyi bàà kunùdi aku bàdi baswikiibwe, bùmvwà dicìncimikiibwa dyà mwena lukunà? Elàayi byanza muulu, bwà ne nudi nuumvwà dicìncimikiibwa dyà mwena lukunà, ne nwènu nudi Dimiinuu dyà Abraham, elàayi byanza muulu mùshindù ewu. Ambà ne: “Mwanèètù Branham, ndi mutàcìshìibwe kùdi dibìnduluka.” Kaa, kùdi byà pa lukàmà bìipacila ku makùmi mwandamukùlù byà bàdi ne cyòci aci. Twàmbè ne, mèmè. . . Bidi ànu bishìtākàne bikolè mpindyewu, musùmbà mujimà wùdi ànu wènda wùlwa mùdi ditutu ditòoke bu mabèèle amu, cidi cyàmba kumvwija mpofò, lwà kunùdi nusanganyiibwa aku.

<sup>194</sup> Kanwènaayikù numòna ne, apa makùmi àbìdi anyi àsàtù, pàmwàpa, a maaluu, anyi mapite, pa cibùmbà cyà ku cyambilu eci apa mene ne mu batèèleji mùdi Nzambì kàyi ùpangila anyi? N'Yesù Kilistò umwèumwè awu makèlèlèlè, leelù, too ne kashidi. Nudi nwitabuuja nànkù anyi? [Disangisha didi dyàmba ne: “Amen.”—Muf.] Kàdi apu mbwà cinyi kubènga, Dimiinuu dyònsò dyà Abraham, bwà cinyi kanùyì nwangata nsapì awu mpindyewu? Mucimunyi munène, wàkanùcimwinacì awu, ùdi kaaba aka. Yèyè wàjaadikì ne ùdi kaaba aka. Nudi baMwitàbùùje anyi?

<sup>195</sup> Nànku angàtà nsapì webè wa diitabuuja awu, olòlè byanza byèbè muulu, wàmbè ne: “Yesù Kilistò, ndi ngiitabuuja bwà dyondopiibwa dyànyì, mpindyewu mene.” Juukilà kuulu. Elà byanza muulu, kàngulà diitabuuja dyèbè mpindyewu. “Ndi

ngiitabuuja, Mukalenge Yesù. Ndi ngiitabuuja mpindyewu mene.”

<sup>196</sup> Mpindyewu tentèkèlàngànaayi byanza muntu ne mukwèndè. Tentèkèlàngànaayi byanza bicyàmakaja muntu ne mukwènde, pa Dimiinu dyà Abraham dikwàbò adi. Mpindyewu sambìdiláku muntu awu. Mutentèkèlè byanza. Yesù wákamba ne: “Bimanyinu ebi nebifilè aba bàdi biitabuuja. Bòbò batentèkèle babèèdi byanza, babèèdi nebàsangalè.”

<sup>197</sup> Sàtaanà, wàmanyi kupangila mu mvità. Mu Dîna dyà Yesù Kilstò, pàtukà mu mwab’ewu, ne lekèlà bantu aba bàye, bwà butùmbì bwà Nzambi. 

*NKAMBWÀ ABRAHAM* LUA64-0207

(The Patriarch Abraham)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diitànù dilòlò, mu matùkù 7 a ngondo mwibidi, cidimu cyà 1964, ku Kern County Fairgrounds mu Bakersfield, Californie, U.S.A. Ndyumusha pa mukaba wa mêyi ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2022 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)



## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)